

ASO LUA, 16 IUNI 2020

Na tauaofia le Fonotaga a le Palemene i le itula e 9:07 i le taeao e tusa ai ma le Polokalame o Fonotaga a le Palemene 2020/2021.

Tatalo.

FOFOGA FETALAI: Ou te faasilasila atu ua toe amatalia Taulumaga a le Fono Aoaofa Faitulafono.

FAAALIGA MAI LE TAITAI O LE MAOTA

E tusa ai ma le Tulafono Tumau 76 a le Palemene ua tuuina atu nei le Faaaliga i le Fono Aoaofa Faitulafono mo le iloiloaina o le Tulafono Tau Faaofi ua faaaliga iinei:

1. Tulafono Tau Faaofi o Teuteuga o Eseeesega (Aiaiga o Totogi ina ua faamalolo le Tumau mai le Galuega) 2020.

TUUINA ATU i lenei aso 15 o Iuni i le tausaga 2020.

Hon TUILAEPA Dr. Sailele Malielegaoi.
TAITAI O LE MAOTA

FOFOGA FETALAI: Ia, avea ia lenei avanoa ou te faatalofa atu ai ma le agaga faaaloalo i le paia o le Palemene i lau Afioga i le Palemia e faapea foi lau Afioga i le Sui Palemia ma le Kapeneta, Minisita Lagolago aemaise o Taitaifono o Komiti eseese a le Palemene ma le mamalu o sui usufono mamalu o le Palemene, o sui lava sa faia mai le fuifui ina ia faapena ona galulue e faatautaia le Fono a le Palemene ina ia saili se manuia aua le tapuaiga a Samoa.

E faapea foi ona ou faatalofa atu i le mamalu maualuga o Ofisa Sili o Pulega o Matagaluega ma Faalapotopotoga a le Malo i lenei taeao i le latou

galuega e faapena ona soosoo tauau le faatinoga o atinae a le Malo e ala i le fautuaga a le Kapeneta.

E faatalofa atu foi i le faafofoga tapuai mai a Samoa aemaise foi o le aufai tatalo i Ekalesia e fia i le atunuu, malo tapuai. E faapea foi le afio o lau Afioga Mamalu O Le Ao o le Malo, Sui o le Fono a Sui Tofia, aemaise o le loaloa ma le lautele o Samoa i le latou tapuaiga. Ia, alo maia, ia manuia le tapuaiga, ia manuia foi faiva o le Palemene.

ISI FAASILASILAGA A LE FOFOGA FETALAI

TEUTEUGA O LE POLOAIGA MO FAALAVELAVE TUTUPU FAAFUASEI

E faasilasila atu i le mamalu o le Palemene ua ou taulimaina nei Teuteuga o le Poloaiga mo Faalavelave Tutupu Faafuasei mo le Koviti-19 e pei ona amata faamamaluina i le aso Tofi 11 Iuni 2020, seia toe i ai se isi faaaliga.

E faatumauiina pea isi aiaiga o Poloaiga o Faalavelave Tutupu Faafuasei na muai tuuina atu.

O lenei Teuteuga ua soloia ai le Poloaiga o Faalavelave Tutupu Faafuasei Numera 16 o le aso 3 Iuni 2020.

TUUINA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).

1. P.P.2020/2021 Nu.20, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae i le P.P.2019/2020 Nu.161, Lipoti Faaletausaga a le Matagaluega o le Palemia ma le Kapeneta Tausaga Faaletupe 2018/2019.
2. P.P.2020/2021 Nu.21, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae i le P.P.2019/2020 Nu.212, Lipoti Faaletausaga a le Ofisa o le Komesina o Sulufaiga Tausaga Faaletupe 2018/2019.
3. P.P.2020/2021 Nu.22, Lipoti a le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae i le P.P.2020/2021 Nu.11, Lipoti Faaletausaga a le Ofisa o le Failautusi o le Fono Aoao Faitulafono Tausaga Faaletupe 2017/2018 & 2018/2019.

4. P.P.2020/2021 Nu.23, Lipoti a le Komiti o Tupe Maua ma Tupe Totogi i le Tala Faatatau o Tupe Faaopoopo (Nu.3) Tausaga Faaletupe 2019/2020.
5. P.P.2020/2021 Nu.24, Lipoti a le Komiti o Tupe Maua ma Tupe Totogi i le Tala Faatatau Autu o Tupe Tausaga Faaletupe 2020/2021.
6. P.P.2020/2021 Nu.25, Lipoti a le Komiti o le Vaega tau le Tamaoaiga i le P.P.2019/2020 Nu.206, Lipoti Faaletausaga a le Matagaluega o Mataupu tau le Va i Fafu ma Fefaatauaiga Tausaga Faaletupe 2018/2019.

**TULAFONO TAU FAAOFI O LE FAATATAUINA O TUPE
FAAOPOOPO (NU.3) 2019/2020 & TULAFONO TAU FAAOFI O LE
FAATATAUINA O TUPE 2020/2021 – felafolafoaiga i luga o le
faitauga faalua**

FOFOGA FETALAI: E tusa ai ma le Tulafono Tumau 132 o le a faaauau felafolafoaiga i Tulafono Tau Faaofi nei e lua e pei ona valaauina ma e tataua ona saunoa sao lava i le Tulaga tau Tupe ma le Tamaoaiga o Samoa faapea Faiga Faavae tau Tupe a le Malo.

Ia, o le avanoa leni mo saunoaga a sui usufono mamalu. Ou te tapa se sui usufono e tulai mai e fia saunoa e amata ai le tulaga o le tatou galuega.

Se i tulai mai le sui usufono mo Lefaga ma Faleaseela.

Afioga TOLEAFOA KEN VAAFUSUAGA POUTOA (Lefaga ma Faleaseela): Faafetai tele i lau Afioga i le Fofoga Fetalai mo le avanoa o leni itumalo se i fai se manatu i le Tala Faatatau Autu mulimuli leni o le Tupe a le Palemene aua leni Paeiga lea ua lamalama faaiua leni tausaga.

Lau Afioga i le Fofoga Fetalai, faafetai ua e faatagisia le Atua i leni taeo e momoli mai le Agaga Paia e taitoalua ma sui usufono mamalu uma o le Palemene aua le lipoiina o leni Tala Autu o le Tupe aua se manuia o Samoa. Ona ou manatu lea, o le a ta piiama faatasi ia i lou sa folau i leni taeo.

O paia o Tiafau, fai mai o le malae e sufi ai le mauili o le tagata lilo, e tupu ai lagona, e fatufatu ai foi manatu e sufi ai le tai lomalomae ae mapu i le tai tafola. Fai mai o le malae e faamemelo i ai Aiga o Samoa ma a latou Tama, e pui-pui e Tumua ma Pule, Ituaia ma Alataua, Aiga i le Tai ma le Vaa o Fonoti. Tulouna laia o Tiafau o le malae o le faautugatagi a Samoa. Ae ou te ofo alofa foi ma faatalofa i lau Afioga i le Ao Mamalu o le Malo ma lau Masiofo, lau Afioga i le Sui o le Fono a Sui Tofia ma lou Faletua, lau Afioga i le Faamasino Sili ma le Ofisa o Faamasinoga.

Lau Afioga i le Faamasino Sili, e momoli atu faamanuiaga a leni itumalo i lou valaauina. Lau Afioga i le Palemia, Sui Palemia, le Kapeneta faapea Minisita Lagolago, lau Afioga i le Fofoga Fetalai ma le mamalu o le

Palemene o Samoa, tainane le afifio o Taitaifono o Komiti mamalu a le Palemene.

Ou te faatalofa atu ma viia le alofa o le Atua aua e lelei o ia i Lana puipuiga lea ua fesagai ai segaula i lenei taeao fou. E le faagaloina Ofisa Sili o Pulega o Matagaluega ma Faalapotopotoga a le Malo aemaise le aufaipisinisi tumaoti, ae a le tapuaiga a Samoa i Aiga ma Tama, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E faatalofa atu foi i Taitai o Ekalesia ma le aufaigaluega galulue a le Atua i so o se fatafaitaulaga, malo tatalo i le ao ma le po, o faamanuiaga ia o Samoa ona a outou galuega mamana ma le mamala.

E faatalofa atu foi i le faigamalo a Tutuila ma Manua, lau Afioga i le Kovana, le Sui Kovana ma le faigamalo, o mamalu lava ia o Fatulegae ma Malotumau, o Laloifi ma Gagamoe, o paia na o le Faleagafulu, ae tainane oe le Tootoo o le Manuatele. O paia na o Samoa mai le papa i Tau seia le papa na susu.

Lau Afioga i le Fofoga Fetalai, ae le i faia se manatu i le Tala Faatatau Autu o le Tupe, e fia gagana le faugagana e momoli le faamalo i lau Afioga i le Minisita faapea le Ofisa Sili o Pulega o le Matagaluega ma le Matagaluega o Tupe i lo outou tautiga e faataoto le tamaoaiga o Samoa i lenei tala faaiu autu o le Tupe. Ia, tautai ae laia o lou sa folau, faamalo le pale, faamalo le uta mamao faafetai foi le faasoa. O lea sa talisoa le ia a Nafanua e lau Palemene, a o se tapuaiga pe tua ma ni a lau faalelegafulu ma lau faatamasoaliiaga o le Tala Autu o le Tupe o lenei tausaga. Aisea? E lua Tala Faaopopo o le Tupe na tuuina mai i totonu o le Palemene ae le masani a'i. Ae ua matauina ma le totoa lou faiva sasaa i lenei taeao, o lele ua logo faa-Tutuila ai le faafofogaaga a le Palemene ma Samoa i lau faautautaga loloto ma lau tofamamao. E moni ai le gagana a le au faatuatua, e le tuulafoaiina i tatou e le Atua. Ae o nai tuualalo I lau Afioga i le Minisita o Tupe, ua tata nei ona e silasila i le Matagaluega lea o Leoleo ma Falepuipui i le lumanai mo se paketi talafeagai mo lea Matagaluega. O lo o nafa lenei Matagaluega ma le puipuiga o le atunuu aemaise lava le Falepuipui. O le Matagaluega lea o Leoleo, o le saogalemu lea o le atunuu. O le Matagaluega lea o Aoga, o le lumanai lea o le atunuu, o le Soifua Maloloina o le ola lea o le atunuu. Ae o Leoleo, o le saogalemu lea o le atunuu. Se i e silasila i ai lau Afioga. O le lava o le aufaigaluega, pei o le mea na tulai mai i le lua masina talu ai.

Ae tuu atu i ou tafatafa atonu o lena e faafofoga mai le Ofisa Sili o Pulega ma le Matagaluega o Tupe, faafetai mo le vaegatupe lea ua faamatuu atu mo a tatou Komiti Tumama. E taua tele le vaega lea aua o se atunuu e ola mama lona siosiomaga e soifua fiafia foi ona tagata. Lau Afioga i le Minisita o Tupe, ona o lenei vaitau o lo o faaletonu ona o le Koviti-19, ua tata ona faamatuu atu se faamanuiaga tau tupe mo le aufaifaatoaga, so o se ituaiga faatoaga ma le aufaifaiva uma o le atunuu e fesoasoani ai i vilalau ma mea o lo o moomia i faatoaga, se miliona e fai ai le faasoa mo itumalo. Lau

Afioga i le Minisita o Tupe, e tupu manatu ona o lou itumalo e le tau faamatalaina. O fua o faaeleleaga ua le gata i le lauelele, a o le gataifale. E silafia lelei e le Minisita mo Faatoaga, Vaomatua ma Faigafaiva faapea le Ofisa Sili o Pulega le mau o lenei itumalo ona o le galulue o ona tagata.

Faafetai mo le \$35 miliona lea ua fuafua mo le aufai saofaga a le NPF. Ae o le fesili, o le a se pasene o le a maua mo sui uma o le a agavaa i lea faamanuiaga? ma e fautuaina foi lau Afioga se i silasila i le tulaga mafatia o lo o i ai le aufai saofaga i le taimi nei e fua i ai lau faasoa.

Faamalo mo le penisione mo tagaeta matutua, ua toatele nisi o lou itumalo ua momoli mai le agaga faafetai i le Malo ona o lea siitaga, e \$160 o le a i ai le tatou penisione.

Lau Afioga i le Minisita mo Leoleo ma Falepuipui, faafetai i le Malo mo le toe tuufaatasia o vaega ia e lua o le Matagaluega o Leoleo ma Falepuipui. Faamalo i lau Afioga i le Komesina ma le Matagaluega i le faatinoina o lo outou tiute aua le saogalemu o le atunuu. Malo le onosai. O le tuualalo a lenei itumalo, faamolemole se i e silasila totoa nei lau Afioga i le Minisita i le toe siitia o le numera o leoleo o le falepuipui i Tanumalala faatasi ai ma totogi o alii mamalu ma tamaitai leoleo o le Matagaluega. Pe ua le alagataua foi ona faaauppegaina leoleo o lo o galulue i le falepuipui mo lo latou saogalemu i taimi e osofai ai e le fili ma ia faatino ni a latou training po o ni aoaoga faaaau mo le faaleleia o le auaunaga. E fautuaina foi lau Afioga, e tataua ona fai se faailoilo po o se sailini i taimi e tutupu ai ni faafitauli e pei ona faaoga foi e falepuipui i atunuu i fafo, o le taimi lava e tupu ai le faafitauli ia faaoga loa sailini leotele lea e logo uma ai nuu, tuaoi ia nofo sauni ma vave ona tali mai aua le puipuiga o le saogalemu. O le nofoaga foi lea na faamamafa i ai lau lauga faataupou. Aisea? Ou te alofa i le saogalemu o lou itumalo, e le ma nofonono pe a tupu mai ni solaaga faapenei, tatou te le fia vaai i ni faafitauli faapenei e ono tutupu mai i le lumanai pe a le malupuipuia lenei nofoaga.

Ina ia avea foi lenei avanoa e momoli atu ai lau faafetai i lou itumalo, i le paia maualuga o si ou itumalo i pulenuu ma nuu taitasi i lo latou tali mai e lagolago i le galuega a le malu o le Malo ina ua tupu mai lenei faalavelave, tatou te momoe lava ma manu ae sau mala e atiai. Ae malo lava le onosai, malo le mataala.

Lau Afioga i le Minisita mo Faamasinoga, faamalo mo le Tulafono o lo o faasavalua nei a le Komiti, o lea ua vavala mai lava le ata i finagalo faaalia ma le lagolago a itumalo o lenei Tulafono o lo o galulue ai le Komiti Faa-Palemene. Faamalo atu i lau Afioga i le Taitaifono ma le Komiti mamalu le galulue. O le fautuaga a lenei itumalo, se i silasila ifo lava i le filifiliga o tatou Faamasino. O le fautuaga, e manaia ae filifili mai ni sui taitasi o itumalo e avea ma Faamasino o le Faamasinoga o Fanua ma Suafa. E faapena foi i le faatalanoaina o a tatou Faamasino, e tataua ona i ai se sui mai nuu i tua o itumalo e malamalama i le aganuu ma le agaifanua.

Lau Afioga i le Minisita mo le Soifua Maloloina, le Ofisa Sili o Pulega ma le Matagaluega, malo le tauivi ma le faatoatoa, faafetai i lo outou onosai. E momoli atu foi le faamalo i le Malo e auala atu i lau Afioga i le Tamaitai Minisita ona o lea ua tufatufa i tua alii ma tamaitai fomai i a tatou sub-centres, o se fuafuaga e lagona ai le fiafia ma le agaga faafetai mo lea fesoasoani taua toe faamama avega i nuu i tua, tausavali mai le falemai tele i Motootua faapea Tuasivi.

Mo le silafia e lau Afioga, o lena na tuuina atu lau talosaga tusitusia i le 2016 mo se sub-centre o lou itumalo, ma o lea sa ou lauga e faamanatu ai le Minisita sa seei talu ai, a o lea ua ou toe faamanatu atu i lau Afioga. Faamolemole, o le itumalo lenei, ua latalata i le 3,000 le mamalu o lo o alaala ma papaaao i totonu o lou itumalo. O le mafuaaga lea ou te tatalo atu ai e toe faamanatu atu mo se matou sub-centre ma se fomai mo le isi Paeaiga i le ola ma le malosi.

Lau Afioga i le Minisita mo le Kamupani Vaalele a le Samoa Airways, faafetai i lau Afioga mo le tauaveina o le tatou kamupani vaalele. Faamalo le tauivi ma le finafinau, o lea ua maua o le a taunuu mai le isi a tatou vaalele fou. Pau le tatalo, faamolemole lau Afioga se i faaaoga alo ma fanau a lo tatou atunuu e galulue pe faaauvaa le tatou vaalele. I so o se taimi lava ou te lauga ai, ou te faamanatu ai pea i lau Afioga i le Minisita ni tatou vaalele se lua, ae talitonu o lea ua i ai se fetuunaiga ona o lenei vaitaimi ma le aafiaga o le lalolagi i lenei faamai.

Faafetai foi i le tatou Malo o lena ua tuuina atu le \$5 miliona o se vaega o le tau i le fanua i Fagalii e fesoasoani tele i le atinae i lenei vaitau.

Lau Afioga i le Minisita mo Galuega, e momoli atu le faafetai i le Palemia ma le Malo e auala atu i lau Afioga, le faafetai a lenei itumalo i galuega o lo o faatinoina nei i Faleaseela, ua 30 tausaga talu ai lea faatoa faaleleia lea o lea auala e fesootai ai Faleaseela ma Falelatai. O le fiafiaga lenei o lenei sui usufono aemaise le mamalu o le itumalo o lo o alaala ma papaaao ai. Faafetai foi i le konekarate a Lucky Construction mo lenei galuega maea ma le matagofie. Ae na ona toe faaloolomaau atu lava i lau Afioga i le Minisita, faamolemole mo isi auala o si ou itumalo, ae talitonu o lena ua e silafia ma o lo o i ina foi le tofa i lau Afioga e tusa ai ma le talosaga.

Lau Afioga i le Minisita mo Aoga, faafetai i lou mataala i auala na faatinoina ai aoga a alo ma fanau ina ua tapunia aoga ona o le faamai o le Koviti-19. Ae se i toe silasila ifo lava lau Afioga po o le a le mafuaaga e le taualoa ai o tatou faailoga Degree a le tatou Iunivesite le NUS i Niu Sila ma Ausetalia e ese mai le APTC. Aua o lea ua oo mai lava le Lipoti faapea seiloga e toe aoga i nai tausaga ona maua lea o nai tusipasi e maua ai galuega. Faamalo i lau Afioga. Se i e tagai i lea faafitauli, e talitonu o le a maua se tali o lea faafitauli, aua o le tatou Faauluuluga fou o le tatou Iunivesite, ua loa tausaga o galue i Iunivesite i atunuu i fafo. Ou te talitonu o le a foia vave ai lenei faafitauli.

Lau Afioga i le Minisita mo Faasalalauga, e momoli atu le faamalo, faafetai i lau Afioga i le tatou Tui Cable ua faaogaina ma le fiafia mo aoga ale fanau, aemaise le tatou digital, ua manino le tatou TV ua leai se nenefu, ma o le aoga foi o lea tulaga, ua maimoa ai si o tatou atunuu i taualumaga o Fonousu a Samoa.

Lau Afioga i le Fofoga Fetalai, e faaleo le agaga faafetai i le Palemia ma le Malo aemaise o le Komiti...

FOFOGA FETALAI: Malie le sui usufono se i tulai mai le faauilavea a le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai, e i ai a si tamai mataupu lava lea ou te tulai atu e faasao i le tulaga lea o mea ia o i latou ua iu mai le tatou Iunivesite. E eseese lava pasi, pei e foliga mai e le aloaia tatou faailoga Tikeri. E leai, e le sao lea faaaliga. Se i vagana lava mea o itu ia faafomai ma ituaiga faailoga technical ia, a o atu i fafo e toe moomia sina taimi, e tatau foi ona i ai le latou aiaiga faapitoa i ituaiga poto ia faapitoa e toe moomia ai e Professional Organizations i fafo ni tulaga faapena, ae leai, o la e aloaia tatou faailoga.

FOFOGA FETALAI: Ia, ua tulai mai le faasaoga a le Afioga i le Palemia, malie le sui usufono aua le toe oo i ai o lea ua i ai le faasaoga a le Malo.

Afioga TOLEAFOA KEN VAAFUSUAGA POUTOA: E momoli atu le faafetai i lau Afioga i le Palemia, masalo o lea ua manino lea tulaga ma le agaga faaaloalo. E faaleo le agaga faafetai i le Palemia ma le Malo aemaise le Komiti o Faalavelave Tutupu Faafuasei, malo le moemoeala e mataitu lenei faamai o le Koviti-19 ina ne i ulufale mai i totonu o le tatou atunuu. A o le talosaga a lenei itumalo i lau Afioga i le Palemia ma le Kapeneta, o fea o i ai le tofa ma le moe ae ua le tatau loa ona tatou faamamalu le Aso Sa e pei ona taoto ai le finagalo o le tatou Malo i lenei vaitaimi, ae tatou agai uma e momoli le faafetai i le Atua mo le aso e tasi mo Samoa, ona o faatasi ai lea ma le faaupuga o lo o i le tatou Faavae, Faavae i le Atua Samoa.

O le tuualalo lena a lenei itumalo, lou itumalo Lefaga ma Faleaseela, o se taimi taunuu atu le Komiti a le Palemene lea e nafa ma le mataupu o le Tulafono o lo o faasavali nei. Mo le silafia e le tatou itumalo, o se Tulafono ua lelei ona fuafuaina aua le faatauaina o tatou Faamasinoga o Fanua ma Suafa, ae o le a le mea e faasino i ai le tatou Faamasinoga o Fanua ma Suafa? O le puipuiga lea o measina a tatou aiga, e ala lea i fanua ma suafa o lo o tatou sapi ai i le lalolagi atoa. E maua foi le avanoa e faalua ona tagofia ai se mataupu, faamama avega ma taugofie aua le faatinoina o se faamasinoga.

E faataua foi le aiatatau a alii ma faipule, ae le faapea ua aveese ai le aiatatau a tagata taitoatasi.

Na pau lava le fautuaga ma le tatalo, ma e talitonu o le tulaga lena o le a i ai, ina ia faatoa faatino le Tulafono i faaiuga pe a maea ona pasia, ae aua ne i toe tagofia faaiuga ua tuanai, aua e le taumate e toe lalaga uma ai finagalo o si o tatou atunuu. I le tulaga o mea tau eleele, o lo o manino lelei le Vaega 102 o le Tulafono o Eleele Faaleaganuu, o lo o faapea mai, e le faaliliueseina se eleele faaleaganuu. O lona uiga, e le mafai ona faaliliu eleele faaleaganuu, ae se i vagana le Malo, e mafai e le Tulafono ona faamatu se eleele faaleaganuu mo atinae a le Malo ae maua le tau. Silasila i le atamamai o tatou tuua mo le faataotoina o lenei Tulafono? Ua maea foi ona ou feiloai i loaia a le tatou Malo ma faaliliu mai ia te au le Tulafono ina ia ou malamalama atili ai. O lea foi ua faafofoga Samoa i le saunoaga manino ma le malamalama a le Afioga i le Faamasino Sili le sa avea ma Faamasino Sili a Samoa. O lona uiga e leai se mea e ono faapopoleina ai le tatou itumalo i le Tulafono e pei ona faasavali atu nei e le Komiti a le Palemene, ma o lea ua maua lou avanoa i le Tala Faatatau Autu lenei o le tupe, ou te logoina atu ai lo tatou itumalo, ina ia taunuu atu le Komiti ae ua maua sou finagalo i lenei Tulafono.

Tofa Olo Fiti Afoa Vaai: Lau Afioga i le Fofoga Fetalai, na o si na mea lava lea, e fia faamalalama mai e le sui usufono mamalu.

FOFOGA FETALAI: Malie le sui usufono se i tulai mai le sui usufono.

Tofa Olo Fiti Afoa Vaai: Faafetai i lau Afioga, o au ua ou tau le malamalama i le saunoaga a le sui usufono, ina ua saunoa mai i le Vaega 102 o le Faavae. Na muamua faapea mai le sui usufono ma saunoa mai, e le mafai le mafai ona faaliliueseina fanua faaleaganuu, ae sau le fuaiupu lona 2, seia vagana ua i ai se atinae. Ua ou le iloa la, e matua le mafai le mafai le fuaiupu muamua ae o lea ua toe faataga mai i lana fuaiupu lona 2, ua ou le iloa la po o le a le sao, ma le faaaloalo.

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui (Palemia): Lau Afioga i le Fofoga Fetalai, o aiaiga lena o le Faavae. O la e sao le saunoaga a le sui usufono, sei vagana eleele, e moomia mo atinae tetele nei mo le faaogaina e le lautele o le atunuu. E pei o se auala, aualatele, o la e i ai le vaega lena i totonu o le Faavae. Ae ua uma foi la ona pasia le Tulafono e faatino ai le aiaiga lena o le Faavae o le Land Taking Act. O lea ou te tau tomanatu o le Nofoaiga muamua... Oi o lea ua faamanatu mai, o le 1963, a o le Nofoaiga

muamua lena a le Palemene ma le Malo i lena taimi, ina ia mafai ai ona faatino a tatou galuega. Ona o le tele o tatou nuu i tua, sa manaomia tele ni atinae faapena, e pei foi o le matou itumalo. E matua manaomia le oo atu o le Malo e avatu le auala i totonu o le matou nuu agai atu ai i Aleipata. Aua e oo mai i le tele o afioaga, e manaomia atinae faapena, e pei foi o le uila i Afuililo mo le faaaogaina lautele e le tatou atunuu. Lau Afioga i le Fofoga Fetalai, o le faalauteleina lena, o la e sao le saunoaga a le sui usufono.

FOFOGA FETALAI: Se i tulai mai le sui usufono o Lefaga ma Faleaseela e faaauau le saunoaga, o lena e sao le saunoaga.

Afioga TOLEAFOA KEN VAAFUSUAGA POUTOA: Faafetai i lau Afioga i le Palemia i le fesoasoani mai. Sa manatu lava lenei sui usufono, ua loa foi tausaga, o seei le sui usufono mamalu i le Palemene a Samoa, ae sa ou manatu ua malamalama, ae tatou faapea ia.

Lau Afioga i le Fofoga Fetalai,

FOFOGA FETALAI: O lea ua saunoa mai le Palemia, o lena e sao lelei lau saunoaga.

Afioga TOLEAFOA KEN VAAFUSUAGA POUTOA: Faafetai i lau Afioga. Le paia o lou itumalo o Lefaga ma Faleaseela, o le Tala Autu mulimuli o le Tupe o lenei tausaga ma lenei foi Paeaiga. Faamalo le tapuai, o lele ua taia le papaloo ma faasaga i papaolomea i Matautu, o le malae o le toto, e afio ai Lemalu ma Le Mamea, susu ai le usoalii, alalatai ai le mamalu ia Salelealii. Faafetai ua see malu le fala o la outou auauna, ona o lau tapuaiga. Ou te taia foi le atutia o aiga i Vaiana, Vaipu ma Olofa e susu ai Sua, afifio ai Faumina ma Tuaepepe, alalatai oe Gagaifoivao. Se ua lagona le malosi i lau tapuaiga, ua auituafau foi le taoto o le masina atoa i matavai ma loto nei, e afifio ai Fui ma Malama, afio ai Tusani e puipui le mamalu ia te oe le atalii Faiga. Faafetai le tui mai o le mulipapaga ma feula le mulila aua faiva o lenei Nofoaiga.

FOFOGA FETALAI: Ua toe lua ou minute ae o lea e foliga faatoa amata le lauga i le Tala o le Tupe. Ae fuafua mai i lou taimi...

Afioga TOLEAFOA KEN VAAFUSUAGA POUTOA: Lau Afioga o lea faatoa ou oo i si ou itumalo. Ua liligo foi mauga o Utumanua i le pau ma Tafagamanu, e afifio ai Tuala ma Tusani ma Leaupepe susu ai Leafumatino ma le matua ia Lepale, le mamalu ia Saleiauta. Faafetai i la outou tapuaiga, ua talamasoo foi le siu o Muliau i vatia ma sualo, e afio ai le uso ma le ailaoa, alalatai ai le nofo ituaiga ia Tuisavailuu, aua ana le seanoa lau tapuaiga, e le ae malo faiva o lou faatauva. O lea ua tuaau ma fuamalu foi le tai o aau

tetele i Mulivai ma Lalotoa, e afifio ai le Taulagi ma le matua o Satuala, alalatai ai tootoo o Maauga ma le falefa o faleaana, malo faafetai tapuai. Ua toe i ai pea la outou sui usufono i le vai manino, ae le o le vai mai.

O ou tama faaleagaga i soo se fata faitaulaga i totonu o lou itumalo, malo fai o le faiva, faafetai i talosaga molia, faafouina lagona ma le malosi i taimi uma, ona o la outou tatalo ma la outou tapuaiga. Faafetai i le paia i faletua ma tausii ma saao, malo le tuualalo ma le fautua, faafetai mo lo outou sao taua, aua le tautuaina o lo tatou itumalo. O le malosi o lo tatou itumalo i totonu, o lo o faaaogaina tatau o tatou eleele, faafetai mo le tautuaina o le atunuu, e auala atu i faaeleeleaga o fua o faatoaga.

Lau Afioga i le Palemia, malo le toa, faamalo le onosai, faafetai mo lau tautua ma lou alofa ia Samoa. E ui ina fetaii ma faafitauli, ae o i ina e lui ai le faatuatua. O aso sousou e iloa ai le tautai matapalapala. O le upu a le tusi, o le alofa e lavatia ai mea uma, ma e le tuulafoaina i tatou e le Atua.

Lau Afioga i le Fofoga Fetalai, faafetai o le sao lena o lenei itumalo e lagolagoina ai le Tala Autu o le Tupe 2020/2021. Faamanuia le Atua ia Samoa, soifua ma ia manuia le Fono.

FOFOGA FETALAI: Malo faafetai,

Susuga Hon Laauli Polataivao Leuatea (Gagaifomauga Nu.3): Lau Afioga i le Fofoga Fetalai...

FOFOGA FETALAI: Ua avea pea le sui usufono na saunoa nei, mo le itumalo o Lefaga ma Faleaseela e tala mai le tele o tatou Fonotaga i Tala Autu o le Tupe po o Tala Faaopoopo o le Tupe. Malo faafetai. Amuia foi lou itumalo e tulai mai le sui usufono usufono faapea, e naunau e tala malae i Fonotaga a le Palemene, e iloa ai sui usufono ua tapena. Faamanuia le Atua i le sui mamalu. Tulai mai se isi sui usufono e saunoa.

Susuga Hon Laauli Polataivao Leuatea: Lau Afioga i le Fofoga Fetalai, e fia maua se avanoa.

FOFOGA FETALAI: Tulai mai le sui usufono mo Gagaifomauga Nu 3.

Susuga Hon LAAULI POLATAIVAO LEUATEA: Ou te muamua ona ou faatalofa atu i lau Afioga i le Fofoga Fetalai, i lenei foi taeao fou ma le taeao manino, i le paia ma le mamalu maualuga ua ee ma papaaao i le Maota Fono i Tiafau. O lea ua maea ona e sisi le fua o le manumalo i lenei taeao, tatou te sula le alofa ma le agalelei o le Atua, ua tatou aofaga potopoto, ona manatu lea tatou saisi ia nei fausaga ma momoli i le fata faitaulaga, aua o la lava o le Atua le Tama le Atua le Alo ma le Atua le Agaga Sa. O le toala faaautama, o si o tatou atunuu ma le Malo o Samoa. Ona manatu lea e

faatulou le paia o le Maota, i le afio o lau Afioga i le Palemia ma lau Kapeneta, afifio foi ma papaaao le paia o lenei tala na atoa, sui Minisita o le Kapeneta aemaise foi Taitaifono, le paia ma le mamalu maualuga o sui usufono uma o le tatou Palemene.

Ou te talitonu o lea ua magoto i atuvasa le inafu o manusina faaautama o Samoa, aua o lea ua paelaufono le sa folau o lo tatou atunuu, ae se i o tatou toe faatu le fagā, ma tatou talatala le laafa ma le lafala, a o tatou alo atu i le faataunuuga o lenei Nofoaiga. O le tatalo sa tuu i le Atua, le Atua e alofa, ia e foai mai se laolao faapenei matou te toe lauluafesilafai. E pei ona feiloai ai tupu o Samoa ia Malietoa ma Tuimanua i le tai samasama e tatala ai le avei, aua le alofa ma le agalelei o le Atua. Se i momoli le faafetai ma le faamalo e ala i lau tapuaiga Samoa. Samoa, e pei lava o upu e fai atu soo, e leai se poto e leai se vave, na te toe suia ala pe sii se matalalaga, o oe o le ao mamala o le ia e iviivia, ma e leai se isi na te toe auautalaina.

O paia o Samoa i ona tulaga faalupe ma mamalu ma ona sa faale-talalelei tulou, mai ona ao seia oo i ona iu, le mamalu o le auaiga Sa Levi, o lo o molimoli lapalapa o Malo, tatalo aua se manuia o Samoa nei ma a taeao. Le mamalu o le tapuaiga a Samoa faale-aganuu, aiga ma a latou tama, tama ma o latou aiga, faleupolu tofia, tainane foi le tapuaiga a si o tatou aiga i Sasae, Sua ma le Vaifanua, Fofu ma Aitulagi, Saole ma Saleaamua ma le Launiu na Saelua. Le faigamalo le afioga i le Kovana sili ma le Lutena Kovana Sli ma le Lutena Kovana, Fofoga Fetalai, Peresetene o le Senate ma lea itu o le vai o le tatou va nonofo ma Tutuila ma Manua.

Le paia o le tatou Faigamalo aua le afio o le Tafatolu faataotooto, va faafeagai ai fealoaloai, lau Afioga i le Fofoga Fetalai, Maota Fono o Samoa ma le mamalu o le Palemene, lau Afioga i le Palemia, le taitai o le Malo ma lau Kapeneta, vaeane lo tatou vatapuia o le tatou Faamasinoga. Le afio o le Afioga i le Faamasino Sili, alii ma tamaitai o le Faamasinoga Maualuga. Lau afioga i le Peresetene, aemaise alii ma tamaitai o le Faamasinoga a Samoa. Ia e ofo alofa atu ma faamalo atu i le tauaveina o le galuega sa i ai e na faamuli atu, o lea ua tutaitaga le vaa o Salemuliaga aua le taunuu mai o le Faamasino Sili fou. O ou mama na, faamoemoe i le Alii lau tofa, ma ia manatua le tapuaiga a Samoa ma le tutoatasi o le Faamasinoga.

Lau Afioga i le Fofoga Fetalai, ua manatu ua tatū i le too ae tepa i le ata, ma ua tu lilia foi tino i pisaga, pe ou tu ma vaai i le to ma tepa i vanu loloto, ae avea ia lenei taeao, ou te momoli atu ai le faafetai tele i lau Afioga i le Fofoga Fetalai. Ou te manatu e le o toe po malae i lau silasila ma lau faafofoga, i se lagona foi ma se manatu o lenei itumalo. Ona i ai lea o le lagona e fai lou leo, e fai ma fofoga taumolimoli o lenei itumalo, i le paia ia Satupua, aiga Satupua, aiga sa Malietoa ma le mamalu o le faletolu. Lea foi itu o le vai, aua le paia i le Mavaega Saeseese, ma le tou fautua, ou te momoli atu ai vaimalu i puega i lau Afioga i le Fofoga Fetalai, ou te talii ae ou faaeteete aua sa o le Nofoa lena e te alaala ai.

Lau Afioga i le Fofoga Fetalai, ou te matuai ou malamalama lelei i le tulaga o le faigata o lau galuega, ae faafetai i lou tausī mamalu, faafetai i lou tausī tupu faafetai i lou tausī faleupolu. I le tauavamea mai o lenei Nofoaiga, ua faamalo fai o le faiva, faamalo tautua Malo. I le tala faasolopito o le tatou Palemene, ou te manatu ua afutoto ma afu maligi lau tautua aua le Nofoa lena o le Palemene. Toleafoa ou te le tau selu atu, pe ou te tau faafuluina lau vagana fetalai, leaga o le vagana sa taumulimuli ai lou vaivai, ma ou aoao ma ou solisolimulivae. I le vaai ma le tu ma le faalogo, faafetai, sa i ai lagona o le mulimulitai i e na muamua mai. I lenei taeao e momoli atu lou agaga o le faafetai tele. Ae momoli atu foi i le agaga o le faamaualalo, faalalolalo atu i lau Afioga ona o le ta va faafeagai ai, mai lava i le amataga o lenei Nofoaiga e oo mai i le vaitaimi lenei, faamalulu atu i lau Afioga i le Fofoga Fetalai. E le o toe po se lilo i lou nei sui usufono, i taualumaga o lo o faafeagai ma au, mai lava i le amataga o lenei Nofoaiga lenei, e oo mai i le taeao lenei. O sau upu ma sau tala o se tu ma se aga ma sau amio ua sala i lo ta va nonofo, Leaupepe ia magalo. Ia tofutufoala i le vai o le Faletuamasaga ae ui magalo i le vai o Salemuliaiga sou sese ma se faaletonu.

Ua ou manatu i lenei aso i lou agaga faaaloalo, e le o toe po malae, ona o le tulaga ua oo i ai lou sui usufono, i le finagalo o le tatou Vaega Faaupufai. Ua ou savali gugu, ua ou manatu e saili i lalo Malo. O lea lava ua ou manatu, sau foi le faasilasilaga a si ou itumalo, ia tausī le filemu. O lea ua i ai lenei taeao. Lau Afioga i le Fofoga Fetalai, e faaalua manino ai, o le a ou tututoatasi ia, e tauave lenei Nofoa o lenei itumalo, ona o tulaga ua tulai mai mo au. Ae le natia ifo ai i fatualavai i ala o mea ma le tulaga faafeagai ai, Toleafoa faafetai i lau pule. Ae ua ou manatu, e le sili le toa na te ae le olo i lo le tagata e pule i lona loto. Ua ou manatu ai, o le lauga faataupou lenei a lenei itumalo i le tulaga tutoatasi.

Le paia e, i lau Afioga i le Taitai o le Malo lau Afioga i le Palemia, ma le tatou Vaega Faaupufai. Ou te lagona lou agaga faafetai tele mo mea uma i le tatou mafutaga. Ua ou manatu i le agaga faaaloalo, aumaia le alofa e fai ma fusi o le tatou feagaiga na osi. Ua ou manatu o lea ua iu le taulaumea ma loifofoga, ae paga lea, e fotu pea matatupu moomooga o faaleleiga ma faamagaloga. O lea ua aumai lau tofa i lou fanoga, ia ou te talitonu e le po pea se nuu. Ae ua ou savali i lou agaga lotomauualalo e fai lo outou finagalo, ona o se faaletonu ua matau mai ua ou sii se ta i lo tatou va nonofo. Ona faapea lea, e faatoese atu i lau Afioga i le Palemia, i sou sese i sou faaletonu, i sau upu ma se tala ua ou lape ai i le tatou mafutaga. Ae pei lava ona ou fai atu, e na o le Atua na te silafia le mea sa i le loto ma le agaga, ae afai ua laaloa ai la outou silasila, ia e le faia sou loto. Ae ou te le tulai gugu, pe ou te tulai e pei o le tulai a Faleata, pe ou te mou e pei o le mou a Aana, e leai, aua e le galo, e le galo ala o vaatele i luga o le vasa. E le galo foi ala o gata i luga o papa i le tatou mafutaga. E faapena ala o tane i tausala, ae tumau pea

le malu o le ufimata, aua e faapena le upu na fai e Ruta ia Naomi, “e fai lou nuu ma lou tofi ma ou Atua,” ae aumaia le alofa e fusi ai mea uma.

O manu na o le tatou Vaega Faaupufai, o le a liliu le sa o lou vaa, saili i luma sou ai, ae o faamoemoega o le tatou va nonofo, lea ua ou faamaualalo atu, o le a se tulaga i se tautua le auau a lenei itumalo, ma se matou tautua ua pao, ia matou asuasua atu vaimalu i puega. Matou faamaualalo atu, a o tulaga o lenei taeao ma le moomooga, ia tasi le faafitiga o aleaga, o tatou o tautua ma faiupu a le atunuu. Ona i ai lea o lou agaga ma le agaga faaaloalo i le faafofoga a Samoa i lenei aso, ia faamagalo le auau. O a foi upu ma tala i luga o upega o faamatalaga, ia e faapena le lagona, e le atoatoa foi le tagata i lona lagona ma lona manatu, ae peitai, a taunuu mai loa i le Maota o Tiafau, ona ou talitonu lea, o iinei e fai ma faata, e limataitaina i ai le folauga a Samoa mo le lumanai. Ua tatou sauniuni atu mo le tulaga o le faaiuina o lenei Nofoaiga, e ofo alofa atu, e faamanuia atu foi i tualumaga uma o le a feagai ai, ma le talitonuga tatou te fesilafai i ulu o gafa ma iu o gafa ma matavai ma mulivai fetai. E faapena ona tumau lou la i luga o Kipeona faapea le masina i luga o le vanu o Airona ae ia tumau ai le manuia o Samoa nei ma a taeao.

Lau Afioga i le Fofoga Fetalai, o nai manatu e tuuina atu ai se lagona o lenei itumalo e ala i le tatou Tala o le Tupe. Faafetai i lau Afioga i le Minisita o Tupe, e lagona lava le agaga o le alofa atu, ma le agaga o le alofa i le faasoa faale-auau. O le upu lea na fai ua taualu, taumafai, autalo po o a ni vovoga ma ni mea o totoe, talofa e i lau faasoa. Ua tatou tanuu nei i le vaitau sa tatau le fuafuaina, tatou taunuu i le taimi sa tatou momoe ma manu, ae sau mala e atiae. Tatou taunuu nei i le tatou vaavaai i lo tatou aafia faatasi i le faamai oti, ma ua saili lava e le atunuu le mea e ola ai, ma ua agai ai ina saili le tamaoaiga, soifua maloloina, ma mea uma, e saili ai le ola. Ae faamalo faafetai, o le a le tatou mea o le a fai, what can we do? Ae e i ai lou talitonuga lau Afioga i le Minisita o Tupe, o nei e faufau ai taeao. O le 40 tausaga sa taumafai i ai aiaiga o le Tulafono o faiga faavae o mea tau tupe, i lau tuualalo, ua tatau ona e toe silasila lelei po o le a le isi fuafuaga o le a toe fai mo le lumanai, e laveai ai tatou, leaga o lea ua tatou aafia uma i le tulaga o le faalavelave lenei e tupu.

Lau Afioga i le Minisita o Fesootaiga, ou te iloa ua faafagogo tagiao atu pea i lau Afioga tulaga nei, ona e i ai lava le lagona, o lea ua uma ona faataatia e lo tatou Malo tulaga o faiga faavae ma mea e puipuia ai lo tatou communication, e taua tele. Ua ou toe nofo ma ou toe vaavaai lelei i le tulaga lea ua faataatia ai le tatou capeway mo Samoa. E lagona lava le agaga popole, ona na vaai i le taimi na filifili ai lo tatou Malo, e faatau ese lo tatou Samoa Tel ae ave le BlueSky, o lea ua uma le BlueSky a o lea ua oo i le Vodafone. O le itu sili ona ou popole, o le tatou capeway o la e pule mai Fiti. E fuafua uma mai i Fiti le tulaga o le vaavaaiga o le saogalemu ma le sefe o faamatalaga. O mea uma ia tatou te talanoa ai, o la e i lalo o le vaavaaiga a

le Kamupani mai Fiti. O lo o i ai le tatou share, ae e le o i ai se tatou control, i le mea lea o le capeway. Na ona toe silasila, mo le lumanai, pe faamata e a pe a tatou toe silasila i lenei Kamupani o le aseta a le Malo. Na ala foi ona fai fuafuaga i lena vaitaimi, ona o faaletonu o tagata sa i ai. Ae peitai ua faatau e le Bluesky le Kamupani lea a tatou i le \$1 miliona, ae faatau nei e le BlueSky agai i le Vodafone, US\$86 miliona. Ona ou lagona lea o le faamoemoe, e peiseai o lea ua taaalo nei Kamupani i luga o tatou aseta.

Afioga Hon Afamasaga Lepuiai Rico Tupai (Minisita mo Fesootaiga, Faamatalaga ma Fesootaiga Vavave Faaneionapo): Lau Afioga i le Fofoga Fetalai...

FOFOGA FETALAI: Malie le sui usufono, se i tulai mai le faauilavea a le Minisita mo Fesootaiga, Faamatalaga ma Fesootaiga Vavave Faaneionapo.

Afioga Hon Afamasaga Lepuiai Rico Tupai: Tulai atu ma le faaaloalo.... saunoaga matagofie a le sui usufono. Ae ou te tulai atu ma le faaaloalo, o se mea e fia faasao, o le tulaga lea na saunoa i ai le sui mamalu i le tatou capeway, e leai se tulaga faapea o i ai. O lo o i ai lava tulaga ia i fesootaiga a Kamupani e lua e agai sao i fafo. E le o i ai foi se tulaga faapea, o tatou o i lalo o le puleaga a Fiti i nei mea, e leai e tutoatasi lava tatou. O le tatou cable lea o le Tuisamoa, e moni o lea e ui i Fiti, ae le alu atu alu i totonu o Fiti, e alu atu lava le tatou uaea alu sao i fafo. E le alu i totonu o faitotota, e pau lava le mea e alu atu i fafo, faapipii le uaea lea e alu ai i Amerika, alu sao loa, e le alu fua tatou i totonu o le atunuu o Fiti. E oo foi la i tatou fesootaiga i Samoa nei, e leai se tulaga faapea o i ai, o lo o i lalo lava o le vaaiga a le pulega lava latou ia, a le Kamupani o lo o i Samoa nei. O le faatauina o le Samoa Tel i le amataga, lea na faatau e le Kamupani a le BlueSky, o le Kamupani lena e major shareholder ai le Kamupani lea o le Vodafone. E leai la se fesuaiga o ni pulega e leai ni fesuaiga tau tupe, e na ona pau lava le mea, na ona sui lava o le igoa lea na i ai ma le fua faailoilo, ae o le Kamupani lava lea na faatauina i le amataga le tatou Samoa Tel. O le agai la o tatou i fafo, e leai, e agai lava le Digicel i fafo, e agai foi le Vodafone latou i fafo. E le o i ai se capeway faapea e o mai faatasi ai i totonu ona o ai lea.

E pei o lou tulai atu lea e faamalamalama le mataupu lea mo le faafofoga a le atunuu. Ne i i ai ni popolega ona o le tulaga tau fesootaiga, ae faafetai i le sui usufono i le lagalaga o lenei tulaga.

Susuga Hon LAAULI POLATAIVAO LEUATEA: E na ona tata logo atu pea Masefau, aua e ese foi le lagona o le Minisita ese foi faamaumauga lea e aumai ia te au. Ou te le fai atu ona o se isi itu, ae na ona ou faamanatu.

E \$11miliona sa faatau ai muamua, alu uma aseta, na ala foi ona fai le mea lena, o le faatamala o tatou i lena taimi o le aufaigaluega. Ū\$86 miliona, lea na faatau ai nei, silasila la i le transaction lea e fetuunai, po o ai la lea e maua tupe i aseta a lo tatou malo. Ae a i ai sou malosi, buy back, faatau mai. Toe faafoi mai le aseta, ona e tele tupe a le atunuu e maua ai, e na ona ou tuualalo. O lo o i ai pea le upu felavasai, o lo o taugata pea le tatou internet, ma slow, e na ona ou faapena atu. O lea foi ou te molimauina e au ia, leaga o lea ou te faaaogaina tele tulaga ia e pei ona ou fai atu.

Lau Afioga i le Minisita o Ava Malosi, ou te lagona masalo e lua tausaga o ou tagitagi i le mea lenei, e 2 tausaga pe ova atu foi. O avatu pea lau tuualalo i le fagu uisiki lea ua poloka nei, na sau muamua o boom vodka ae uma ane ua olioli. O faamaumauga e matautia le fagu uisiki lea, na ua outou vaavaai ma outou silasila i le matautia o le onana a tagata. E onana lava i le matapogia, lena foi e tele faamaumauga na e i ai i tulaga o lenei fagu uisiki, e dangerous. O lea sa ou tata logo atu lava e vaai le mea lea. E oo i tamaiti aoga ua inu faafaguinu, ave i atoaga ua inu inu inu. Ua ou tatalo atu foi i tatou test i uta, e matua fai se control lelei, peitai, o le tau ma mea uma, o lea ua outou silasila i ai i togafiti na ua fai, o lena ua ou vaai atu i le pepa, ua matua fai auala eleelea e fai ai lisiti sese faasese ai le Matagaluega, e le o toe natia, faataugofie e le o toe totogia lafoga, ae o lea lava sa ou tuitui atu. E toetititi lava 2 1/2 tausaga, ae peitai e pei sa faataliga tuli lava le Matagaluega. O le agaga lena lau Afioga, faafetai o lea ua fai le suesuega. Faamolemole aua ne i toe tatala ia Kamupani e aumai mea leaga e taumamafa ai le atunuu. O isi lisiti ia ua ova atu ma le \$15,000, tuu atu i lau Afioga e fesoasoani i le suesuega. E le uma, a outou o nei e suesue uma, e le uma, na momoli atu e tagata ia te au, e momoli atu i aao o le Afioga i le Minisita, se i e seu silasila i le Kamupani lenei.

O se Kamupani Saina na sau i inei, o la foi ua matua ave i ai le lagolago a lo tatou Malo, ae o lea e fua mai mea ia, ia ou te lagona e le lelei mo le tatou atunuu.

O le tasi lenei o atinae o lea ua vaai ua tulai, o le faletalimalo lea o le Le Lava Hotel a le Digicel, lau Afioga i le Fofoga Fetalai...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

FOFOGA FETALAI: Malie le sui usufono se i tulai mai le faauilavea a le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ae le i see ese le Afioga i le sui usufono lea e tele ia upu i le pisinisi lea. Ma o uiga ia o mea mo latou

e fai pisinisi e alu sao lava ia le latou talosaga i officials ma fai lea e latou le iuga mo e pasia o se pisinisi faapea.

O au foi la ua ou te i ina ua aumai ia faasalalauga ma ou vaai i interviews, o lea foi la ua uma ona ou tilotilo i faamaumauga na aumai, sa sailiili e Matagaluega atonu e aumai i ai se faamatalaga a le Minisita, ma ua faamaonia mai ia le tulaga o le uisiki e leai lava se mea o faaletonu. E pau lava le mea lea e ia te au, o lou tilotilo atu i faamatalaga o lo o aumai, e pei ua suamalie tele. Ua uma foi ona fai lau upu, e tatau ona tilotilo i ai ia le Matagaluega ma fai i ai se faaiuga. Afai o le uiga lea o mea ia, taofi loa. Taofi e aua ne i toe faia. Po o a foi afai foi e i lalo o le Tulafono e mafai ona fai, tipoti ma lena Saina i fafo.

Lau Afioga i le Fofoga Fetalai, o le tulaga lena. Ou te popole i le upu lea faapea ua lagolago e le Malo. O mea faapenei o galuega e faatino i totonu o le Matagaluega i tulaga lava faamasani o le tatalo atu e fai le suesuega a le Matagaluega ona fai ai lea o le latou faaiuga. Ae e oo foi la i le tele o faleoloa nei ua uma ona faatalatalanoa se i silasila i mea ia, ona e i ai lava ia ituaiga pisinisi ua taatia mo o tatou tagata. Ae e i ai foi la ma le faaletonu ma e le faa-tasi ona ou talanoa ai i le itu lea, i le tulaga lea o le nonofo o tatou tagata ma le tagata mai fafo. Po o le Saina po o le Siamani po o le Peretania, ae a nonofo loa ma le teine i fafo, e faaaua mai ia ni a latou talosaga mo ituaiga pisinisi faapea, i le igoa o le toalua, ia o le a le mea o le a fai i ai? E le mafai foi ona iloa vave seiloga ua tu i luga ua faagasolo le pisinisi. Ae o le mea foi lea ua matauina, o ni isi o pisinisi nei, ua nonofo ma lisi atu i tagata mai fafo.

E ala la ona ou tu atu, ona e taua ia le fautuaga a le sui usufono, ae pau lava le mea o la e i ai ma le mea la e sau mai i tua. Ae e pei e mimilo foi lea ae o lea sa e saofai ai i totonu o le Kapeneta, ma ona silafia ai tulaga o le faatinoga o mo mea o faiga pisinisi faapea. Ae atonu ua uma foi ona avatu lau tusi masalo po o le aso ananafi e toe silasila totoa i le mataupu lea. O le faigata lea e i ai, ona o le tulaga foi lea o le faasuamalie ma o i ina tonu lava e tatau ona fai i ai se iuga, atoa ai ma le tulaga o le tasi lava le lanu, aua ne i toe faalanuina ma le sese ai ma isi loomatutua ma inu faapea o ni vailanu. O itu la ia e tatau ona silasila i ai ia le Matagaluega o lo o nafa ma tulaga ia o ituaiga pisinisi faapenei.

Lau Afioga i le Fofoga Fetalai, o le itu lea ou te tulai atu ai, ona o le sui usufono o lo o saunoa nei, sa saofai i totonu o le Kapeneta ma na malamalama i mea ia e fai.

FOFOGA FETALAI: Malo faafetai, tulai mai le Minisita e fitoitonu ma le vaega lea e tonu ma tau, le Minisita o Tupe Maua.

Afioga Hon Tialavea Fea Leniu Tionisio Hunt (Minisita mo Tupe Maua): Faafetai mo le avanoa. Faafetai foi i le sui usufono o lo o saunoa. Atonu foi e toatele foi nisi te i ua toe talanoa mai i le mataupu lea.

O le mataupu lea i le faleuaina lea, e le o se pia ia le olioli, o le uaina. O le process e fai ai, o le uaina le mea inu lea. Na ave uma lava i le SROS ia faguinu ma uaina nei ma test mai ai, ma o la e i ai ia faamaumauga e tau mai ia Mati o le tausaga lenei o la e saogalemu.

O le Kamupani lea na amata mai i le 2015. O le Samoa le partner a le Saina lea. Ae i le faatinoina o le pisinisi lea, lea ua uma ona fai aulape o le Tulafono, ma ua uma foi ona totogi ia faasalaga. Ma o la e taofi ia le gaosiga o le uaina lea i le taimi lenei. O la ua loka e le Matagaluega ia le fale gaosi ai le uaina lea, i le taimi lenei ae faia ia suesuega pe faamaonia ia tuuaiga o lo o faia nei. Ua maea foi le iuga a le Liquor Board ananafi. Sa talanoa faapitoa i le mataupu lea. Ma o la foi ua fai ai faaiuga e tataua ona talafeagaa i totonu o le Tulafono.

O le galuega ma le vaaiga foi o pisinisi nei, e i ai lava Tulafono a le Matagaluega aemaise foi ia le Liquor Board i faasalaga ma mea e fai. Ua uma la ona ave ia faasalaga ia i le Kamupani lea, ae o lo o loka pea le fale, se i toe fai mai ni isi suesuega a le SROS. Po o fea lava e ave agai i ai, ia ae talitonu ua uma foi ona... o la o le a taumafai e fai se isi faiga ina ia mafai ona aua ne i toe faaaogaina fagu plastic ia. Ae o le uaina le fagu lea. O le malosi la o le uaina e gata mai i le 15% le malosi, o le ava malosi e gata mai i le 15% so o se uaina lava i i nei o lo o maua i fafo e faapena e 15% e gata ai ia le malosi o le uaina lea.

E leai foi se naunautaga e faapea o lo o tutusa uma lava i le Liquor Board, e tutusa uma lava le faagaioiga o pisinisi tau liquor uma lava, e tutusa uma lava ia le Tulafono la e faagaioi ai. Ae faafetai i le sui usufono ua lagalaga mai, ia e leai se faapitoa a le Malo ua ave i le Kamupani e tutusa uma lava Kamupani.

FOFOGA FETALAI: Malo, o lena ua saunoa atu ia le Taitai o le Malo i na fagu uaina ma... ia se i vaai ina ne i te i ua tatou le lavea i le Koviti foi lea mai fafo ae tatou lavevea i Koviti a Saina ma uaina na. E pei e sili le tuu, e sili le puipua i lo le togafitia. O a tatou mea e maua mai i na laisene ma mea faapena ae tuu te i ua oti se isi.

Tulai mai le sui usufono e faaauau le saunoaga.

Susuga Hon LAAULI POLATAIVAO LEUATEA: Ia faafetai lau Afioga i le Fofoga Fetalai. Ia e ta te le faia se tala faatupu, leaga o mea ia e saunoa mai ai le atunuu, o tatou uma ua tatou tofo i le mea o le pia. E tatou te iloa foi onana po o le a le tau i lou ua, ae o le ona i le mea lea, ou te le fai atu, matuai ona lava i le leai o se mafaufau, ona i le fagu lea. O lea ua ou fai atu, matua **blackout** lava.

O le ala lena o lou tagitagi atu i lau Afioga i le Minisita. I've **been dapping** you, ona e sau foi lea i le isi aso ma musumusu mai, se i uma mea la e i luga o fata ona taofi lea. Se i silasila la i le mea na tatou o i ai? E matautia lipoti

a leoleo. A tatou o nei e aumai lipoti a leoleo, ia na outou silasila lea i ai i le **affection** o le mea lea, ui o lea, o lena ua saunoa atu le Fofoga o le Maota. Taofi aua le toe faia....

FOFOGA FETALAI: Malo, see ese le saunoaga a le sui usufono ma le mataupu lea ua maea ona malele le Minisita.

Susuga Hon LAAULI POLATAIVAO LEUATEA: I le itu lea, tulou lava lau Afioga i le Fofoga Fetalai e le te i te i ou fai atu, ona o le manumanuga, ia o le Kamupani foi lea e tasi o lea latou te faatauina le nonu. O la e faafofoga mai ia le asosi o le aufai nonu. E matautia le complain la e fai i le tau o nonu moto, ma tau o lau o nonu e faaaoga. O lena e tou te silafia le process. Afai nei ae poloka le tatou maketi i fafo, e le poloka na o latou, e poloka ia le maketi o le nonu a Samoa. E pei o le mea lea na tatou lavea ai i le ava. Silasila i le ava, ua fiu e taumafai, poloka uma le lalolagi atoa, ae lea e tuufau le aualii ia.

Ia na ona ou fai atu, lau Afioga na sau nei foi le malaga a Saina lea na sau nei, na ave uma lava i ai oka nonu, ae matamata fua uma isi kamupani. O le ala lena o lou fai atu silasila ifo ia le faasoaa a lo tatou Malo ma le agaga faaaloalo.

FOFOGA FETALAI: E le o toe tele se taimi o le sui usufono. Ou te faamanatu atu, e le o toe tele foi sou taimi.

Susuga Hon LAAULI POLATAIVAO LEUATEA: Lau Afioga i le Minisita o Falemai, ia malo le onosai, talofa e Faimalo i lou taimi, ia tele ia fita ma faigata. E le i maea atu ia le fano o le atunuu i le misela, ia ae o lea foi ua toe faaopoopo atu ia le faamai oti ia faamalo atu i le Matagaluega le galulue, faamalo le onosai. Aua o lea o nai mea e matimati ia le taunuu mai tatou malaga lea e omai ai nai o tatou tagata. I lau vaai ua ou tilotilo i pepa a nisi o lou aiga na omai, ua uma ona justify mai i o, they are cleared. E leai se mea e toe quarantine foi ia tatou i inei. A sau loa le tagata alu e quarantine i lona fale, ma le maumau o tatou tupe tele lea e tau faaalu fua, ma fafaga ma tele ai fua le taimi.

Ae e na ona tuualalo atu faapena i lau Afioga i le Minisita ma le Matagaluega, si mea laitiiti se i e silasila ifo ua oo mai foi ia le talosaga a nai fomai ma tausii mai, e le i maua lava ia latou alauni i le taimi o le misela. Ae na ona avatu faatafatafa i lau Afioga e te silasila i ai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

FOFOGA FETALAI: Tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mataupu lea i le tulaga o le fautuaga lea e tuu mai, ua uma ona ave le fautuaga i le tatou... i le aso ananafi. Ave i ai le fautuaga i le Komiti se i toe silasila i ai i le itu lea. O nei la e fonofono ai le Kapeneta, e toe tilotilo i ai i le itu lea, ona ua i ai se lagona, ua tupu ifo i le Kapeneta e tatau ona toe tomanatunatu ia le tatou Komiti aemaise lava ia le itupa lea o fomai, ma o tatou tagata ia ua tatau ona aumai mai i fafo. O lea foi la o le toatele o tatou sa galulue faavaitaimi, o lea ua tatau ona tapena e omai. O lea la e faatalatalanoa nei le mataupu lea, ma le toe tilotilo pe le tatau loa ona omai loa, o tagata latou i tua.

E pau lava le mea lea e tau taofiofi ai, ona o faasilasilaga ia e aumai, e i ai isi taimi e lavea ai le tagata ae na toe test atu mulimuli leai ua uma, ae toe test atu ua toe maua foi. O le tulaga la lena o lea e i ai le faaeteetega lau Afioga. Ae o le agaga ia i lo tatou Malo, e taumafai ina ia omai loa o i tua o tatou tagata. Ae i le itu lea e fai lava ma faautagia ai pea le tuualalo a tatou fomai, ona e leai ni isi e nafa ma le itu lea pe a oo loa ina lavea tatou. O fomai lava e muamua aafia, ae o le mea la lea, o le tatou manao lava e le mafai ona taofia. Ua leva foi na manao ia le Kapeneta e aumai ia tagata la e i fafo, e faapea foi Tutuila. Ae e i ai lava ia le faaeteetega lau Afioga, ona e fai loa le mea lea ae toe tulai mai mulimuli ia le faaletonu, ia ona tau foi lea o le pua ma lafo mai ia ma faapea mai e avatu lava ma o outou talia. Ae o lena e i ai le faautautaga tatau ia te outou e fuafua tatau ai.

Lau Afioga i le Fofoga Fetalai, o le lalolagi lea e tatou te i ai, e tumu i le mea o le ituaiga faafitauli e tatou te le o mailoa. Ae o le manao ia, e leai se mea e gata ai le manao. O tatou matua manao e fai le mea sili ona faigofie, ae a oo loa ina to mai faafitauli, o ai e tauavea? O le Malo lava e tietie i ai.

FOFOGA FETALAI: Malo, faafetai i lau Afioga i le Palemia. Toe 2 minute o le sui usufono o lo o saunoa nei.

Susuga Hon LAAULI POLATAIVAO LEUATEA: Ia faafetai i le Afioga i le Taitai o le Malo le faamanatu. Ia ona o lea e toe 2 ou minute...

Tofa Olo Fiti Afoa Vaai: Lau Afioga i le Fofoga i le Fetalai, ia na ona ou talosaga, ona o lea lava e le i maea ona faamatala ia le fagu olioli lea e pipii ai se label wine i luma. Ae malie lau Afioga ou te faatu atu se lafo, *I sina 10 minute, o le manaia ia o le lauga a le Afioga ia Laauli i le faalogologo pe a tusa ai ma lou finagalo.*

FOFOGA FETALAI: Ia e lelei ona tuuina atu pea le fesili pe a na i ai se isi e faaluaina. Ae o lea e leai se isi e faaluaina lou finagalo ma...

Susuga Hon LAAULI POLATAIVAO LEUATEA: Ia aua ia le gasea le faautaga, faafetai tele le faaaloalo Salega, aua e te popole. Sa ou manatu o lau lauga faataupou leni, ia ae o lea lava ua lava tuu lava ita o le a tipi motu lava i i, e le afaina lau Afioga i le Fofoga Fetalai. O le lauga faataupou muamua leni ua fika i le taimi. Ae ui o lea, ou te gau ma le au sou lagona. O lea faatoa ou tutoatasi, I'm free. Ia ae o lea lava ua faatamuta mai si ou avanoa...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ana faapea e aumai le lafo e faatulai mai, i le lauga faataupou, o le faalavelave ua leva ona pau le sui usufono. Semeamanu ou te tulai atu i lou talitonuga, o le isi sui usufono lea e malamalama lelei i Tulafono a le Vaega leni, ina ia faagasolo le talanoaga. Afai lava e leai se isi o matou e leai atu, ou te le aia i ai.

FOFOGA FETALAI: Ia, malie ia le sui usufono, ia ae faaiu maia le saunoaga.

Susuga Hon LAAULI POLATAIVAO LEUATEA: Ia aua e te atugalu oe le toeaina, tumu oe i le faatamatama.

Lau Afioga i le Fofoga Fetalai, ia o ala lava ia o mea. E faapena lava taualumaga e le o se leai nei o le leai ua leva.

Lau Afioga i le Fofoga Fetalai e ava atu, o le a taatia isi Matagaluega ae o le a ou agai sao atu i le Minisita o Tupe.

FOFOGA FETALAI: Ia malie le sui usufono o lena e tulai mai le isi sui usufono o Gagaifomauga Nu.3.

Afioga Faaulusau Rosa Duffy Stowers (Gagaifomauga Nu.3): Ioe o le ala lena lau Afioga i le Fofoga Fetalai. Ae sa ou fia faaluaina le lafo a le Tofa ia Olo, ae peitai leaga o la ua tutoatasi si ou tuagane. Ia o lea la, ou te leai foi au ia.

FOFOGA FETALAI: O le mea sili, o le fautuaga a le Fofoga Fetalai, o lena ua sao lou finagalo. O Olo o se isi sui usufono tau faaosole lena o lea e i ai nei.

Tofa Olo Fiti Afoa Vaai: Lau Afioga i le Fofoga Fetalai, ia e le afaina. O lea la ua manino nei, e sau Laauli ae e le toe sau Faaulusau.

Susuga Hon LAAULI POLATAIVAO LEUATEA: Ia, aua ia le... e teu pea le va. Ou te le pei o le Gagae e fai mai e eseese o ma manatu. Faaulusau, tosi i le matatafi lo ta va. O le manifinifi lena o le ta vanonofo. E ui o lea, ou te le tali leaga o oe o lau taupou. O oe o le ioimata o le ta vanonofo ma le ta vatapuia. Pe e te leai nei, ou te ioe mo oe taeao. O le agaga lena.

Lau Afioga i le Minisita...

Tofa Nafaitoa Talaimanu Ketu (Gagaemauga Nu.3): Lau Afioga i le Fofoga Fetalai...

FOFOGA FETALAI: Ia se i tulai mai, leaga o lea sa na taua lou suafa.

Tofa Nafaitoa Talaimanu Ketu: Se ua malie malie le saunoaga a Gagaifo, lea e pei ua toe tifa mai i le Gagae. Ae malie le sui usufono, faaauau le saunoaga, aua le lavea fua le maaveave le fua. Leaga e lavea loa, ia ona e silasila lea i ai, ma le faaaloalo.

FOFOGA FETALAI: O le mea lea na ou fautua atu ai, lau Afioga i le sui usufono mamalu o Gagaifomauga Nu.3, o le mea lea na ou fautua atu ai. Aua e te lua faalogo i le sui usufono ia Olo, leaga o le tasi lea sui usufono faaleaga mea faaleaga va o lea e... ae alo ia i lau saunoaga.

Tofa Olo Fiti Afoa Vaai: Lau Afioga i le Fofoga Fetalai faamalulu atu, ou te le faaleaga mea. Ae pau lava le mea ou te alofa ai i le Gagae lea, ia o fea o i ai se malae o Vaituutuu o toe i ai i i? Ua leai se mea, na tiai e le sui usufono lea.

FOFOGA FETALAI: Ia alo ia e faaiu maia le saunoaga.

Susuga Hon LAAULI POLATAIVAO LEUATEA: O le a ou faia ou foliga o foliga foi lea. O le a ou faia foi ma ni fusuaga faapea.

Tofa Nafaitoa Talaimanu Ketu: Ao lou faiva lena. O le 2 o ou lima e faaaoaga. O le mea lea, se tuu le avanoa e faamaea le lauga lea ua uma foi le taimi. O lea foi e... e le i aveesea e au ia le Vaituutuu, vaeatu la e faafofoga mai lou nuu o Saleaula. Ia afai e te le o alu i Saleaula, aua e te tautala fua i Saleaula. Ia ma le faaaloalo.

Susuga Hon LAAULI POLATAIVAO LEUATEA: Aua le toia le va, alaala i lalo.

FOFOGA FETALAI: Faaiu maia le saunoaga. Faaiu maia le saunoaga a lau Afioga i le sui usufono mamalu.

Susuga Hon LAAULI POLATAIVAO LEUATEA: Gagaemauga Nu.2, ia aua le tee le uluga. Ia e faapena ia a tatou upu faa-Savaii. Matautu, o le faamalumaluga o Malo, toa le tai. Afai foi o le a se saunoa atu a Salega, ia lau o le fiso lau o le tolo. Ioe, e pau lea o le tagata o lea ua ou iloa e sao i le Palemene, e na o Levao. E na o Olo. Ioe, ona e i ai le taimi. Nafaitoa, ou te le fai atu, o lenei ua uma ona faataotooto, le Tupua, na ou sau i Vaituutuu e lele, aua ne i galo. O le ala lenei o lou fai atu.

O le ala lenei o lou fai atu leaga e le vaea. Pe e te fai mai e le tutusa ia o ta manatu, ou te fai atu pea e tutusa.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, pei lava ua uma le 2 minute o le sui usufono.

Susuga Hon LAAULI POLATAIVAO LEUATEA: Faaiu sou leo. Lau Afioga i le Fofoga Fetalai, pisaga lava o le taeao aua le celebrate ina o lou tutoatasi. E faavae i le Malo Tutoatasi o Samoa. Pure independent.

O le agaga i lenei taeao lau Afioga i le Minisita o Tupe, e avatu moomooga alofa i lau faasoa. Ma ou te manatu, o lenei e i ina le tofa ma le faautautaga. A ou vaai ma autalatala ia le tatou Tala o le Tupe, o le mea moni, o le tatou tupe pau, lea ua fai ai le tatou Tala i le Tupe o le tausaga lenei. **We are deficit, we are broken.** Ou te le iloa po o le a le faaupuga. O lea na faa-Samoa e Asiata Saleimoa le upu lenei i, ae ou te musu e fai atu. Ou te musu e fai atu ne i te i ua ou palauvale. Ae o le tulaga i le tatou Tala o le Tupe, faatulaga sao lau Afioga, ia e pau le tatou tupe o lona uiga e gau le tatou Tala o le Tupe. Ia e fautuaina lava le tofa ma le faautautaga.

FOFOGA FETALAI: Ua ou faamalulu atu i lau Afioga i le sui usufono, mamalu ua maea lou taimi.

Susuga Hon LAAULI POLATAIVAO LEUATEA: O fea e faapaleni ai le \$205 miliona lea e pau i le tatou Tala o le Tupe? E faafefea ona faafiti? E faafefea ona fai?

FOFOGA FETALAI: Le sui usufono mamalu e...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e pei lava o lea e galo i le sui usufono, na tatou faapena mai foi i lenei tausaga.

Susuga Hon LAAULI POLATAIVAO LEUATEA: E ala la ona ou fai atu lau Afioga, o lea na tatou faapena lava lau Afioga. Na tatou loan uma mai lea o le \$205 miliona e fai ai le paketi. Ae o le a le mea ua loan ai na o le \$11miliona? Ua faasa tatou loan?

FOFOGA FETALAI: E i ai le upu foi lea a le aumatutua, e tou tou lava le taavale ae o la e alu lava e leai se mea e le mafai ona fai. O mea uma lava la e i luga la e alu lava. Ia ae malie le sui usufono, ua uma lou taimi.

Susuga Hon LAAULI POLATAIVAO LEUATEA: Ia, ua uma se manatu o lenei itumalo lau Afioga i le Fofoga Fetalai, e tiga le naunau atu ma le momoli atu o ni fesoasoani foi mo le tatou Malo, ia ae ua lava lea. Ne i te i ua avea lou naunau ma mea sese ma tulai uma mai le Kapeneta e faataumatatao mai.

Ia e faapena ona taumafai atu se fesoasoani. O ni manatu ma ni lagona ua tuu atu le Afioga i le Palemia ma le Kapeneta, ia na ona lafo atu i ina a faaoga lelei. A leai foi, ia toe faafoi mai. Ae manatu e sili ia le faauma o le lauga a lenei itumalo i luga o le ET Live, e pei e lelei lena e manino ai ma auilili. Ae o lagona o lenei aso lau Afioga i le Fofoga Fetalai, e momoli atu le faafetai tele. O lagona ma manatu i le tulaga foi o le tatou vanonofo ai, lea ua uma ona ou oo atu. Le paia i le Palemene, ia o outou uso, uso tuofe uso taufeagai, uso e u tau le pau, o tatou na filifili mai tatou e le atunuu. O lo ta vaa sa tuu talaloa sa faamoemoe i Fogapoa, aua le malae o Pule. Fuifatu, o le malae lena ua ta sulufai i ai, e fia maua se mapusaga.

Lau Afioga i le Taitaifono o le Komiti, o le Tulafono, ia alo i ou faiva, leaga o oe o le tamaitai o le motu. E pau lava lea, ia e manatua o le Komiti Faapalemene, o le Komiti a le Palemene. E te tutoatasi i tuleiga ma saunoaga, e faaali ai manatu. Aua tou te **defense** ina Tulafono. Aumai manatu o tagata ona aumai lea o le tou lipoti.

Ia ma le isi itu, ou te fiafia tele o lea ou te vaai atu o lea e atoa Saleaula, oi ia Safotulafai, Leulumoega, ia aemaise ia Tuisamau. Ia ae faatutu lava ia le Afioga i le Gafatasi e fai upu. O fea le va faafeagai ai i le tausiga o aiga? Ia na ona faapena atu, o i ina le tofa ma le faautautaga. Ia o se upu laavale Samoa i lenei aso, ia faafoi mai ia Laauli ae faafetai i lau Afioga i le Fofoga Fetalai, faafetai foi i le tapuaiga a lou itumalo, ia tatou te feiloai i le vaiaso fou, ia ona faapena lea ona fai ia se tatou lesitala. Ia ma lou agaga faaaloalo, manuia le fonu.

FOFOGA FETALAI: Ia malo, se i tulai mai...

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai, ona o lea ua maea le saunoaga a le sui usufono. Ae silafia lelei e le toe tau faailoina tootoo o Samoa. Ae o ai e tua i ai Tootoo pe a oo

ina lotaluta ia le gataifale? E tua i le fuesina. O le tofa a le tamalii e tatala, ina ia malu ai le atunuu.

O le faaaloalo na uma ona fai ai le faatau a Leulumoega, Tuisamau ma Tootoo o Fuifatu, Fuimaono, ua ese le taeao lenei. Afamasaga e matematea Malo, fetau ma le tootoo o lau Afioga o le fuesina o le atunuu, tatala le tofa. Ia o le mea lea e tau faamanatu atu ai, o Tapaau e le na o le nofonofo i le tala ma faamalumalu. E malu le tofa a le atunuu i Tapaau o le Maota, ia ma le agaga faafetai.

FOFOGA FETALAI: Ia malo, faafetai. Ua maea le... malie le sui usufono.

Susuga Hon LAAULI POLATAIVAO LEUATEA: Ou te tausii vaatele leaga e faigata le vatapuia. E faapena foi lenei itu. Ae afai e le tautamalii, faafoi mai sou lagona ma le vaivai, ma le agaga faaaloalo.

FOFOGA FETALAI: Malie le sui usufono, ia malo.

Tofa Ili Setefano Taateo Tafili (Aana Alofi Nu.2): Lau Afioga i le Fofoga Fetalai, na o se avanoa lava, leaga e faigata le faafogafoga tapuai a Samoa.

FOFOGA FETALAI: Faamalie atu i le sui usufono, o lea ua tuu atu le avanoa i ni sui usufono e saunoa. Afai o lea o le a e saunoa i le saunoaga lautele i le tatou mataupu, ia o le a tuu atu le avanoa. Ae afai e leai, malie o le a tatou... se e le tau afaina Samoa.

Tofa Ili Setefano Taateo Tafili: E ava tele i lau Afioga, faafetai.

FOFOGA FETALAI: Ua iloa, Tumua ma Pule, Ituau ma Alataua, Aiga i le Tai ma le Vaa o Fonoti, ia e faapena foi ia le paia o Aiga. E le o na o tootoo. O Tootoo e latou te faamamaluina aiga. Ia e faapena, ia na tatou omai uma lava o tatou o matai. O le ala foi lena na faavae ai e o outou tuua ma matua le Palemene lenei, seiloga e te matai faatoa e... ioe, ia ae aua le matai ona sau lea foi lea e nofo i le taulaga, ae matai alu i tua e nofo ai i le saofaiga. Ioe, ia iloa le taimi e taumafa ai i le ava ma iloa ia le... amata mai i tua i le sufiava.

Ia o le mea lena e igoa o le matai tautua e amata mai i tua. Ia tulai mai se isi sui usufono e saunoa. Ia tulai mai le sui usufono o Siumu. Ia o faafogafoga tapuai mai Siumu, o lo outou sui usufono lenei o le a saunoa i le Tala o le Tupe.

Afioga FAALOGO IOSEFA SOPI (Siumu): Faafetai i lau Afioga i le Fofoga Fetalai. E muamua ona faatalofa atu i lau Afioga i leni taeao. E momoli foi le faamalo i le faafoeina o le Fonousu a Samoa i leni taeao. E faatalofa atu foi i le Afioga i le Palemia, le Sui Palemia ma le aiga Kapeneta faapea Minisita Lagolago. Faatalofa foi i Taitaifono o Komiti Eseese o le Palemene ma leni Itu o le Maota. Avea foi leni itula e faatalofa atu ai i Faauluuluga ma Pule Sili o Matagaluega faapea Faalapotopotoga a le Malo o lo o mafai ona tatou faatasi i leni aso.

Lau Afioga i le Fofoga Fetalai, e faatalofa atu foi i le afio o Le Ao o le Malo ma le Masiofo. E faatalofa atu foi i le Afioga i le Sui o le Fono o Sui Tofia ma le faletua. E faatalofa foi i Taitai uma o Ekalesia Kerisiano i totonu o Samoa o lo o mafai ona faafogafoga mai i leni itula.

Lau Afioga i le Fofoga Fetalai, e faatalofa foi i le paia o Samoa o lo o faafogafoga mai i so o se itu i leni itula, le paia i Tama ma Aiga, Aiga ma a latou Tama, le Usoga a Tumua ma Pule, Aiga i le Tai ma le Vaa o Fonoti.

E faatalofa foi i le Motu i Sasae i le faafogafoga mai i le afio o Tupu ma Tamalii faapea Maota e Lua o le Fono mamalu a Amerika Samoa.

Lau Afioga i le Fofoga Fetalai, e avea foi leni taimi e faatalofa atu ai i si ou itumalo o lo o faafogafoga mai i le paia ia Sa Asomua ma Aiga e Lua, Tuuu ma lo outou Aiga Sa Tuuu, le falelua o Tulafale ia Mano ma Faoagali, Lio o oe o le Fofoga o le Alataua, Utaileuo ma le faletolu. Faafetai i la outou tapuaiga, faafetai i la outou tatalo o lo o mafai ai e lo outou sui usufono ona maua le manuia ma tulai atu i luma i leni aso, i luma o le Laulau a Fono a Samoa.

Lau Afioga i le Fofoga Fetalai, ae le i faia se faamatalaga i le Tala Faaopoopo Lona Tolu o le Tupe ma le Tala Faatatau Autu o Tupe 2020/2021, e muamua lava ona avatu se faafetai i lau Afioga i le Palemia faapea le Aiga Kapeneta, le Taitaifono o le Komiti Faapitoa mo Faalavelave Tutupu Faafuasei ona o la outou galuega faifaiepa seia oo mai i leni itula aua le puipuia o si o tatou atunuu ne i oo mai le faamai o le Koviti-19. E momoli atu le faamalo tele, faafetai mo fautuaga a le Komiti o lo o ave i le Kapeneta ma le Palemia o lo o mafai ai pea ona tatala tuutuuga ma sa sa i ai seia oo mai i leni vaiata, o lo o matauina pea e le o misia lava le vaiaso ma le tatala o nei tuutuuga e pei ona sau ai mai le amataga.

E momoli atu foi le faafetai i sao a Matagaluega eseese aemaise lava i latou o lo o taulamua i luma, po o i latou o lo o i luma o le front line aua le taumafaiga o leni faamai. E momoli atu ai le faafetai i alii ma tamaitai fomai, susuga i malu o le Malo ma i latou uma o lo o i luma pea i taimi uma, le aufaigaluega a le malae vaalele ma le aufaigaluega a le Samoa Airways ma i latou o lo o outou tutu pea i luma aua le faafeagai ma le agai mai i totonu o le atunuu ma e o lo o femalagaai.

Lau Afioga i le Fofoga Fetalai, e momoli foi le faafetai i paaga ma atunuu o lo o fesoasoani mai i leni faamoemoe, po o leni faamai ma taumafaiga a

le Malo o lo o i ai i le taimi nei. Faafetai mo a outou fesoasoani eseese e ala i seleni, o vai a fomai ma mea o lo o maua ai tui ma mea uma o lo o tapenapena ai pea si o tatou atunuu i lenei itula. Ia e oo mai i le taimi nei o le tele o tapu ua tele ina tatala, lea e momoli atu ai le faafetai i le Taitaifono o le Komiti i a outou fautuaga i le Palemia ma le Aiga Kapeneta.

Lau Afioga i le Fofoga Fetalai, o le a ootoo atu se faamatalaga i le Tala o le Tupe o lo o i lumamea nei, ae muamua ona momoli atu le faafetai tele i lau Afioga i le Minisita o Tupe faapea le Ofisa Sili o Pulega ma le Matagaluega mo le taumafaiga mai ma le tuufaatasia o lenei Tala Autu o le Tupe mo le tausaga 2020/2021. E le faigofie la outou galuega i le fetuunaiga o galuega e tataua ona ave i ai le faamuamua ma galuega e toe tuu ese mai le lisi o galuega e aumai e Matagaluega.

E momoli foi le faafetai i Matagaluega eseese ma outou sao o aumai i totonu o le Tala o Tupe, aua o le Tala o Tupe, e eseese lava, e finau lava le Pule Sili ma lana ia aufaigaluega ina ia maua se tupe lelei aua le faatinoina o galuega eseese a Matagaluega taitasi.

Lau Afioga i le Fofoga Fetalai, e masani lava i tausaga uma taitasi e fai ai lau lauga i le Tala o le Tupe. E fai lava lau tala lea, maumau e pe ana faapea e tele se mea e tua i ai lo tatou atunuu i le tamaoaiga, pe ana faapea e lava se tupe maua aua le faatinoina o nei galuega eseese o lo o talosaga atu ai pea alii ma tamaitai sui usufono o le Maota. Maumau e pe ana tutusa tatou ma isi atunuu i fafo o lo o lava le tamaoaiga aua le faasoasoina i galuega eseese, galuega o lo o faia ma manaomia i itumalo ma nuu taitasi.

Lau Afioga i le Fofoga Fetalai, o le a amata atu se faamatalaga i le oototoga o galuega o lo o moomia e si ou itumalo. O lo o faafofoga mai lou itumalo, ua maea ona tuuina atu a tatou tusi talosaga ma manaoga i le Afioga i le Palemia faapea Minisita, ia e leai se mea tou te popole ai ua saunoa mai le Palemia, o le a faatinoina uma manaoga a i tatou. Tatou fiafia laia, pau le mea ia tapuai mai. Ou te iloa e faataunuuna uma lava ae le i uma lenei Paeaiga o i ai, pe toe 6 masina pe toe 7 masina, ia e oo atu ua ta uma auala galue, o auala uma, o mea uma o lo o outou aumaia i luma o le tou sui usufono, ia, e leai se mea tou te popole ai, o la ua saunoa mai le Taitai. Ua iloa foi a saunoa mai lava, ua lagona foi le mafanafana.

Ae tau ina ootoo atu nai galuega e pei o le 4 auala galue, o auala i totonu o le itumalo ua tele ina faaleagaina. O le auala i le Coconut Beach Hotel, ua toe ina le toe mafai ona feoi ai ni taavale i lenei vaitau, o le alavai po o le ford lea i se tasi o vaega o le itumalo. Ia, o paipa alavai o se tasi o pitonuu o lou itumalo o lo o talosagaina se vai aua lo latou pitonuu.

Ia ona oo mai loa lea i le Afioga i le Minisita mo Faatoaga, e momoli atu le faafetai tele o lea ua i ai le pole foi lea mamao e tua i ai le aufaifaiva o lenei itumalo. Faafetai foi o la e ua amatatia se tasi o ramp po o se vaega lea e toso ai vaa, ae tasi lava le talosaga e tuuina atu, leaga sa maua i lau saunoaga i le amataga o le Paeaiga, pole foi ia i le aloalo. Ia, e fai foi si tele

o le aufaifaiva a lenei itumalo o lo o fagogota foi i le aloalo se i tagai ane lau Afioga i lea tulaga i se pole aua ia lea tulaga.

Lau Afioga i le Minisita mo le Soifua Maloloina, faafetai. E momoli atu le faafetai i la outou galuega o lo o faia i lenei taimi aua le taumafaiga lea ia tetee ese atu le Koviti-19 pe a oo mai. E momoli atu ai le faafetai tele, e to lou pulou ia oe ma le aufaigaluega i le Ofisa Sili ma le mamalu o le aufaigaluega, faafetai i la outou galuega.

Ae na ona toe tuu atu i ou autafa le talosaga sa avatu muamua foi, e i ai le matou health centre tuai o lo o i ai, o le taimi nei ou te iloa po ua lata i le 20 tausaga talu ona le toe faia ai se health centre, o lo o avanoa pea. E na ona tuu atu po o fea o i ai le tauala se i e alofa ane i se matou health centre.

Ia ona oo mai lea i le Afioga i le Minisita o Tupe Maua. Lau Afioga e moni o lea ua e saunoa mai i le uaina lea o lo o vevesi ai nei ma... ae se i tagai lava lau Afioga, a ta vaai i atunuu i fafo na o le lua lava lanu o le uaina, na o le lanu mumu ma le lanu paepae. Ia a o uaina ia ua... e le iloa po ua fitu ituaiga uaina ia e faatau nei. E sao ai le saunoaga a le Afioga i le Palemia, e sili pe a faa-tasi se lanu pe afai o le uaina lava. A le o lena, e lagolagoina manatu ua avatu nei, taofi loa lea uaina.

O le isi itu e avatu, o uaina i fafo a faamafu po o le thymidylate ou te iloa e atoa le lua masina o fai lea process. Ae i le taimi lenei aua na o o i ai le asiisiga a le matou Komiti i i le vaega lea, fai mai na o le tolu lava po aumai... Ou te le iloa po o a mea la e faaoga... O fafo a fai le thymidylate process lea e aumai berries po o mea foi ia lea e aumai ona faaoga lea. O le uaina lea e faaoga i inei a tatou, ou te le iloa pe tau o se uaina. Aua o le isi tulaga lena ou te le iloa po o le a le mea ua faataga ai ona faatau faauaina, ae sa sau muamua o le uisiki ma isi tulaga sa sau ai. Na o se fautuaga lava e avatu i lau Afioga, se i tagai ane i le process lea e fai e le au vaega, ae sili ai pe a tuu loa. Ia, o le tulaga foi i...

FOFOGA FETALAI: Se i tulai mai lava le Minisita mo Tupe Maua.

Afioga Hon Tialavea Fea Leniu Tionisio Hunt: Lau Afioga i le Fofoga Fetalai, o le process ina o le uaina lea e tusa ai ma faamaumauga lea e aumai ia te au e le matou Matagaluega, e tusa ma le process ina o le uaina foi lea e fai i le wine. O le uaina lea e fai i le araisa, e faamafu le araisa ona aumai loa lea vaimama ona utu loa lea i fagu ma ave ai le colouring lea e fai ai. E pei ona talanoa atu, o le tulaga lena o lo o i ai le faiga o le uaina lea i le faamaumauga lea e aumai i totonu o le matou Komiti o le Liquor, lea foi la na matou o vaai.

Ae i le faalanuga o uaina nei, sa avatu foi talia e le Komiti, ma o lea ua fai le galuega i le taimi lenei e toe vaai ai i le uaina lea pe faaauau po o le a se isi faiga ina ia mafai ai ona tasi se lanu e faaogaina. Ia ma le fagu foi, aua ne i toe faaogaina le plastic ae faaoga loa le fagu lea, bottle e mafai ai ona

sui. O le talanoaga lena o lea ua amata ona fai ia ma toe timai le vaauga o le uaina lea, e faamoemoe uma lava i le SROS i le result e aumai. O le isi mea e sosoo ai o le ave loa i fafo o fagu uma nei, aua e le na o le fagu lea, e i ai foi isi fagu a le isi foi vaega lea e produce fagu faapea. Ae o lea ua amata ona vaai i ai le Komiti ona toe aumai lea.

FOFOGA FETALAI: Ia, malie le sui usufono ona o lea ua tatou... Ia se i tulai mai lava le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, se e aoga foi mea e tutupu e maua ai manatu fou. E i ai le fagu malosi a le au Sapani e igoa o le SAKE ae fai mai i le araisa.

Masalo atonu o le tasi lena auala, fai se igoa Samoa foi lea ona aua a lea ne i tuu i ai se lanu ae faapaepae foi pei o le SAKE a Iapani e fai mai le araisa. Ia atonu tasi lena mea e aoga foi manatu e faatupu mai totonu o le Maota lenei e ono toe tilotilo i ai i le fagu malosi lea a le vaega lea e le iloa pe manaia e mafai foi ona export i fafo i Sapani ma Saina.

FOFOGA FETALAI: Ia, leaga o lea ua taunuu i le...

Afioga FAALOGO IOSEFA SOPI: Se i faauma atu lau Afioga.

FOFOGA FETALAI: E moi? Ia ou te manatu o lea ua tatou o o i le tatou malologa, afai o le a e tulai mai lava e faauma loa ia o le a toe tuu atu le avanoa.

Afioga FAALOGO IOSEFA SOPI: Faafetai i lau Afioga. E leai o le a faauma atu, toe tasi lava se mataupu lea i le uaina lea e taua lea e fai i le araisa, ia tatou te masani uma i le Tusi Paia o lo o fai mai o le vine e fai ai le uaina. Ia tagai i lena itu faamolemole.

Ona oo mai lea i le Minisita mo Fuainumera Faamaumauina, faafetai tele mo le National ID, atonu o lea ua i lumamea nei, o le a amata ona faalauiloa i le masina fou. Atonu tasi lea vaega ua leva ona tatau ona oo i ai tatou, le National ID lea aua e aoga i faiga palota, aoga i vaega uma. Faafetai mo lea faamoemoe i lau Afioga.

Ia ma le Samoa Airways, faafetai o lea o le a toe taunuu mai se vaalele mo le toe faaauau o femalagaaiga i si o tatou atunuu. Na pau lava le talosaga e tuu atu, se i tagai i lenei vaitaimi o le lockdown pe aoga le vave aumai pe tuu atu laitiiti i tua.

Ia e faauma atu ai lau Afioga i le Fofoga Fetalai, e momoli atu le faafetai tele, faafetai i Afioga i alii Minisita ma le tamaitai Minisita mo la outou galuega o lo o faaauau pea.

Na pau o lea, si ou itumalo o faafofoga mai...

Afioga Hon Fiamē Naomi Mataafa (Sui Palemia, Minisita mo Punaoa Faalenatura ma le Siosiomaga): Lau Afioga i le Fofoga Fetalai, ua ou te iloa i le sui usufono mo Siumu po o le a le tamai Minisita lea e fai mai ai, ou te le iloa po o le talavou po o tamai foi ia o tamai solofanua se i vaeane le... se i tau faasao mai ea le gagana i le...

FOFOGA FETALAI: Ia, se i...

Afioga FAALOGO IOSEFA SOPI: Ia, e faamalulu atu i le Tamaitai Minisita, leai na tau atu lava le tamaitai a ua le uma atu, e faamalulu atu ai. Ae momoli atu le faafetai i lau Afioga i lenei itula mo le faatautaiga o le Fono o Samoa.

Ia si ou itumalo o lo o faafofoga mai, o le sao lena i lenei Tala o le Tupe ua i lumamea nei, manuia le fonousu, faafetai.

FOFOGA FETALAI: Malo faafetai. Tautuana ma sui usufono mamalu ia faapena ona... O isi sui usufono e pei e ati le laulau pei e faapena, ae se i tautuana e fai faalelei, e lelei lava le kolēni lelei i tua e sau ai loa. E faapena. Ae ou te faafetai foi i le sui usufono, na pau lenei o le sui usufono e faaaloalo mai i le Nofoa. Faafetai tele lava. Ioe. O le tatalo a le Nofoa i le itumalo, talosia ia e te toe sau e ese lou faaaloalo.

O le a faataatiaese Galuega a le Fono Aoa mo lana malologa masani.

Na faataatiaese Galuega a le Fono Aoa mo lana malologa masani i le itula e 10:55 ma toe faaauau i le itula e 11:40 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.3) 2019/2020 ma le Tulafono Tau Faaofi o le Faatatauina o Tupe 2020/2021.

FOFOGA FETALAI: Ou te faasilasila atu ua toe amatalia Galuega ma Taulumaga a le Fono Aoa Faitulafono.

Ou te talitonu ua maua le malosī e le paia o le Kapeneta aemaise lenei Palemene, e faapea foi Ofisa Sili o Pulega o Matagaluega ma Faalapotopotoga a le Malo, ua maea le tatou faasiliga malosī.

Ia, e faia le malologa ua maea ona saunoa le sui usufono mo le itumalo o Siumu. Ma lou faaaloalo ou te tapa se isi sui usufono mamalu e tulai mai e faaauau le saunoaga.

Ia, tulai mai le sui usufono mo le Nuu Tu Taulaga i Sisifo.

Afioga FAUMUINA ASI PAULI WAYNE FONG (Nuu Tu Taulaga i Sisifo): Faafetai i lau Afioga i le Fofoga Fetalai. E talitonu ua matu i fau le taligasua i lau Afioga i le Fofoga Fetalai aemaise foi le Afioga i le Palemia ma le Kapeneta, ae faapena foi le mamalu o le Palemene i lenei aso.

Ia, o lea ua maea atu se vaega muamua o le tatou Fono, a o lenei itula se i taumafai atu le sui usufono o le Nuu Tu Taulaga i Sisifo aua foi se manatu e faufau ai le tatou vaa i le Tala o le Tupe i lenei tausaga 2020/2021. E talitonu le agaga ua le toe po se lilo ua le toe i ai se itumalo lenei, ae faigata o lo o afifio Susuga i Faafeagaiga ma o latou faletua, aemaise foi o le osigataulaga a Susuga i Faafeagaiga, faletua, Patele ma Tiakono ma le loaloa o le itumalo o le Itu Taulaga i Sisifo sa i ai. Ia o lenei vaitaimi, e pei ona silafia o lea ua suia nei le vaega o lo o i ai le itumalo lenei, o lea ua vaevaeina ai i itu e fa.

A o le i oo atu la se faamatalaga i le tulaga i le Tala o le Tupe, e muamua foi ona faafeiloai atu i le Faleata Nu.2 i le tulaga o lo o i ai le 2020/2021 i faiga filifiliga. O lea o le a ou taumafai atu i ai i le itumalo fou lea aua foi se avanoa mo le Palemene a Samoa i le 2021. O lea e faatalofa atu ai ia Seiuli o le Alo o le Malietoa faapea foi le falefia o alii, fetalaiga ia Ulugia ma Ulugia e faasino i ai Vaiusu.

E faafeiloai atu foi ia Nuu ma Leatinuu, Siliga ma Matua Siliga, si o matou nuu o Vailoa, aemaise nuu lagolago o le itumalo o lo o i ai nei e pei ona i ai isi nuu e 11 o lo o i ai, lea o le a tauva i le faiga palota 2020/2021. E ui lava ina eseese itumalo, ae talitonu le agaga o le mea lava e tasi, lea sa tatou i ai i le tausaga 2016 seia oo mai i lenei taimi. O lea la e momoli atu ai le faafetai tele i le itumalo tuai mo le lagolago foi na aumai aua foi le Paeaiga lenei o lo o tau faaiuiu nei ma faafeiloai atu foi i le itumalo fou i se finagalo foi aua le tausaga fou. O lea la e momoli atu ai le faafetai tele.

Ae o lenei itula, masalo o le a oo se faamatalaga i le tulaga o le Tala o le Tupe. Lau Afioga i le Minisita o Tupe, faafetai tele mo le tala maeaea, ia, e matau lava ma le alofa i lau Afioga i le Minisita i le taumafaiga o lenei Tala o le Tupe, matagofie ma lelei. Ia, ae talitonu le agaga, o lo o ia oe lava le tomai aua le faasoasoina o ni seleni o lo o i ai le tatou Malo i lenei vaitaimi. Faafetai foi mo lou toa i le tulaga o le faasoaina aemaise foi o le aufaigaluega a le Matagaluega o Tupe, o lo o taumafai ina ia tofutofusia i tatou uma ma se faamanuiaga. E ui ina faigata i lenei vaitaimi o faamai, a o lo o tou taumafai pea. Ia na ona nofo ma ofo alofa atu, a o lo o i ina le tofa, o lo o i ina foi le toa e faasoai a tatou tupe aua le agai i luma o si o tatou Malo.

Na ona tatalo atu lava lau Afioga i le Minisita, masalo o le 4 ai lenei o tausaga o taumafai atu pea lou sui usufono i se avanoa mo le auala i Falelauniu, o lenei o le a uma le Paeaiga o taumafai atu pea. O lo o nofonono foi ma matau atu i le manaia o galuega tetele a le Malo ua uma ona faapaiaina

ma tatala, ae amuia lava na itumalo lau Afioga i le Minisita o lo o maua pea e i latou le avanoa e mafai ai ona agai atu i a latou faatoaga e ala i auala galue aemaise foi auala laupapa. O lea ua tilotilo atu o lea ua fai le auala laupapa o Moamoa. E momoli atu ai le faafetai i le Malo ona o le tulaga lea i le vave ona faatino. Ae se i tagai ifo lava lau Afioga, vaai ifo lava se seleni o i ai i ina o totoe i lenei tausaga i le Afioga i le Minisita mo Galuega se i taumafai ai le galuega lea lau Afioga. Ou te talitonu sa aumai lava le tala, o le fuafuaga i le va o le SLC ma le LTA, ia o lea o le a 4 tausaga o fai lenei finauga mo lenei auala. Ae na ona tuu atu i ina lau Afioga ina ia mafai ona faatinoina lea galuega ae le i uma lenei tausaga.

Susuga Hon Papaliitele Niko Lee Hang (Minisita mo Galuega, Felauaiga ma Atinae Esecese): Lau Afioga i le Fofoga Fetalai...

FOFOGA FETALAI: Malie le sui usufono se i tulai mai le Minisita mo Galuega.

Susuga Hon Papaliitele Niko Lee Hang: Faafetai i lau Afioga i le Fofoga Fetalai mo le avanoa. E le fia faalavelaveina foi le saunoaga matagofie a le sui usufono mamalu. Na ona ou faailoa atu, o le galuega lea i Falelauniu, o lea ua faasolo atu i ai le polokalame a pasia loa le Tala o le Tupe lea, ona faatino loa lea, leaga ua matauina i le matou asiasiga ua tele le aafiaga o le auala lea i Falelauniu ma Vaitele-uta ma Nuu. Ae taatia mai o lea o le a faagasolo atu lava le polokalame o faiga auala. Ma le faaaloalo lava.

FOFOGA FETALAI: Malo, malo lava. Ia se i tulai mai le sui usufono mo le Nuu Tu Taulaga i Sisifo.

Afioga FAUMUINA ASI PAULI WAYNE FONG: Faafetai lava i lau Afioga i le Minisita. Leai e tuitui atu pea, ona o lea foi ua oo i le isi Tala o le Tupe, leai e ao lava ona tuu atu pea i ina i lau Afioga. O lea sa tuu atu sao i lau Afioga, ae pei o lea ua faaaua atu i le Minisita o Tupe e pei o ia lea o lea e faasoasoa tatou seleni i lea vaitaimi ma lea vaitaimi. Ae faafetai mo le tali malamalama o lea ua faafofoga mai Falelauniu, o lea o le a fau atu le tatou auala ma faata le tatou auala ma nisi galuega o lo o fia fai. E talitonu e manaomia foi nai moli lau Afioga, e fai lava si pogisa o le nuu. Ma e talitonu o lo o i ina ia le fuafuaga.

Lau Afioga i le Minisita o...

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga

Fetalai, e talu lava ona talanoa le mataupu lea e le Kapeneta, masalo o le isi sui usufono malosi lea aupito sili ona faatiga i le Minisita, o le Afioga lea ia Lautafi, ona o i ina i le itu lena o lo o alaala ai. Masalo la e sili atu ona mamafa i le Minisita le finau a le isi Minisita, a o le faaopoopo mai o le sui usufono ua atili ai ona tau mamafa teisi atu.

FOFOGA FETALAI: Malo faafetai. Se i tulai mai le sui usufono. A faamamafa tele foi ua lelava e le Minisita tauave.

Afioga FAUMUINA ASI PAULI WAYNE FONG: Faafetai i lau Afioga, faafetai foi i le Afioga i le Palemia faamamafa mai foi i lenei aso, ae masalo na o nai manaoga lava e avatu. E lelei lava le fai atu i luma i i lau Afioga, ae faafetai o lea ua taufai tali uma mai le Minisita ma le Afioga i le Palemia, ou te iloa o i lea o le a faatino ai le tatou galuega.

A o le Minisita mo Tekonolosi; lau Afioga i le Minisita, ia o lea ou te tilotilo atu i i i le tulaga o le faasoaina o le seleni, po o e matauina o lea sa aafia nei le fale o le tatou Faatonu i se malaia o le afi. Ou te talitonu o lena e i ina ia oe le tofa foi ina ia faatino ai ma maua se isi fale lelei e sui i ai le Ofisa Faatonu ona e taua le Matagaluega lea lau Afioga i le tatou Faigamalo i lenei vaitaimi. O le taua ona o le tulaga faatekonolosi i lenei tausaga. E ui lava ua faamavae mai le pule Faatonu, ae e talitonu o lena e i ina isi pule lelei foi. E na ona tatalo atu i lau Afioga, ia e alofa ma toe vave ona faatino se fale lelei aua le fuafuaga. E tele galuega fai a le Matagaluega, o le a ou le oo atu i tulaga o cables po o Kamupani nei latou te faia tulaga ia. O lo o i ina ia oe le tomai foi o galuega tau cable ina ia mafai ona faatau ma faaleleia atili.

Lau Afioga i le Minisita o Faamasinoga, ia e nofo lava ma le alofa atu i lau Afioga i lenei vaitaimi, i le tulai mai o Tulafono eseese e aafia ai lau afioga i tulaga o le tatou va nonofo ai ma le faamasinoga. O tulaga ia, o tulaga matautia, e matautia lou lelei pe a lelei, e matautia foi lou faaletonu pe a le lelei. Ae talitonu le agaga, o le a le oo se faamatalaga i le Komiti leaga e faigata o lea o lo o i le Komiti le Tulafono. Ae e nofo lava ma le popole i le lagalaga o si o tatou atunuu i Tulafono ia, ae o le a faatalitali se manatu, o lea foi e i ai le Komiti. O le Komiti o lauia, o lea e i i le isi, o lea e i le isi ou itu le isi, e le mafai ona faaletonu ni manatu. Ae o le a faatalitali le lipoti, atonu e alofa le Atua e fesoasoani i le Komiti aemaise le Afioga i le Taitaifono, ina ia maua se iuga lelei, o nei faafinai, po o le a tonu lava le tulaga e taatia ai le Tulafono lenei. O lo o i ai i latou fai mai e le lelei, a o lea foi e i ai le Matagaluega o le Ofisa Sili a le Malo fai mai e selau pasene. Ae o le a tatou faatalitali, talosia ia ia maua se tali lelei, se musumusuga ina ia mafai ai ona tatou maua ai se tulaga lelei, ina ia mafai ai ona faaleleia le faamasinoga, aemaise le tulaga o lo o i ai.

Lau Afioga i le Minisita o Aoga, o lea ua faasolosolo ina uma le tulaga o le tatou Paeaiga i lenei tausaga. Ae o lou lelei ia lau afioga ua uma ona fai ta faleaoga. Fai le isi faleaoga ua uma ona fai, o lea ua fufou le isi faleaoga lau Afioga, le faleaoga lea o Vaigaga lea sa fesoasoani mai i ai le World Bank. Ae se paga o lea ua maua le faamatalaga, e tele atu le tupe e alu i le plan ma le supervision o le faleaoga o lo o faatinoina e se konekarate. Uma ai ma le tupe, ae le i fauina le faleaoga. O lea e tatalo atu ai i lau Afioga, toe tagai i ai, pe leai se isi kamupani feololo e mafai ona latou faatinoina lea galuega, ae sefe ai le seleni, ina ia mafai ona faatino lea galuega. Faafetai i lau Afioga ona o le tulaga i le tatou faleaoga i Tafaigata ma Falelauniu. E so o se mea lava e te saunua i ai lau Afioga, e le mafai ona le tupu. Ua e tu i le va o ta itumalo, o Falelauniu e toatele i latou e agai mai i ai ma saili malo mai i ai, aemaise le motu tele i Salafai. Ua o mai nei, e mamao faleaoga ma mea o lo o i ai, ae o lea ua ou vaai atu o lea ua asu le palapala, o lea ua vavae, o lea o le a fai le ta faleaoga. E lelei oe e te toe tulai mai, leaga o lenei e i ai le avanoa tele, e te toe tulai mai ai. A ua lava lava le faleaoga lea mo au, e o i ai le fanau a le itumalo, ua lava lea lau Afioga, ae faafetai tele lava mo lau faaalalo i tulaga i faleaoga ma tulaga ia.

Ona oo mai lea i le Minisita o Tupe Maua a le Malo, ua vaivai le ta tupe maua i lenei tausaga ona o tulaga o le tele o lou alofa, ua mafai ona faasafua atu i tua aua meaalofa ona o le tulaga i le faamai ua oo mai. Ae e te toe maua nisi tupe se tele lau Afioga pe a faatetele ifo meaalofa ia ua aumai. E toe foai mai foi e le Atua nisi tupe i lau Afioga mo le isi tausaga. O au ia ou te le mautinoa pe ou te toe sau, ae ou te iloa, e le mafai ona faaletonu ona o lenei e te alofa i tagata lau Afioga, ae taumafai ia e sacrifice taua i lenei vaitaimi aua si o tatou atunuu.

Lau Afioga i le Minisita o le Soifua Maloloina, talofa e i si ou tina, ou te alofa ia oe ona o le tele o fuafuaga ia ua i ai i le tulaga o le faamai, ma mea uma ia o lo o aafia ai si o tatou atunuu. Ae te le o gaoia lava, o lenei lava e te toa, aua o le mea lenei e lelei ai le tina i i le tulaga lea, o lenei e te toa. E na o le aufaigaluega lava ma lau tama lenei e taitaia, ae pei lava ou te iloa, o oe lava lenei e te tuualalo i ai, lau Afioga i le Minisita, ae faafetai lava mo lou onosai. E te le i mafaufauina e te oo ina, ona oo mai lea o faamai nei, e leai o le finagalo lava o le Atua lea o lo o i ai, ae o lea lava e manuia Samoa. O le mea lea lau Afioga i le Minisita o... po o toe avanoa lava avanoa ia na ave ai tagata i fafo. Sa ou alu e fai lau siaki ae ua le toe maua se avanoa e.... faamau ifo ai lo ta igoa i ina lau Afioga ua tataua ona toe siaki i se taimi vave, ne i te i ua afaina le sui usufono e le i faia le faigapalota.

Lopao, si au uo o Lopao, malo lava le soifua i lau Afioga, e le mafai lava ona e faaletonu, talu lava ona e oo atu i ina ua tele mea lelei. Ae tele mea lelei toe tele foi ma faafitauli, ae talitonu o lenei lava e to'a lau Afioga. E tatalo atu ai, toe tilotilo lava i le tatou talo, popo, koko, ua tele ina faila solo ia fuafuaga a le Matagaluega, ae ou te iloa o le auga lava lea o le tatou export

ma le auga lea o le tatou faamoemoe, leaga e fai o le talo e ave i fafo ma le popo e ave i fafo, a o tagatanuu foi o Samoa o lo o nonofo i inei, o le mataiaia lea o tatou. E tatau lava ona fai uma ni tulaga faapena. Ou te iloa a fai uma maumaga o aiga lau Afioga i le Minisita pe a i ai se polokalame lelei i ina, ou te iloa pau lava lau mea e fai, o le sue o le maketi ona matou o atu lea i ina i lau Afioga e ave i ai, ae aumai le tupe a nai tagata fai faatoaga. Ae e toe tilotilo foi i le koko, e tele lona aoga lau Afioga, sa o tatou ola mai ai i aso la, i le tulaga i le koko, ae pei ua tau le toe tilotilo tele tatou i le tulaga lea, ae o lona foi e te afio mai i le afioaga o tupu o koko Samoa. Ou te talitonu o lona e i ina le tofa, i le tulaga lea.

Lau Afioga Papalii faafetai tele, o lona ua e tali mai, o le a le toe fai atu se faamatalaga ona o le tulaga o lona ua e tali mai, ua lava lea mo au.

Si ou tama o Tuitama, malo le soifua i lau Afioga i le Minisita o Tina ma Tamaitai, e toe faamanatu atu lava le ta polokalame lea, o taiala mo itumalo. Ua uma ona faataatia le auivi o taiala, ua uma ona tapenapena i ai nuu ma alalafaga. Ae e i ai isi nuu, e le i mafai ona talanoa i isi nuu i totonu o le taiala lea, ona o fuafuaga o le vaeveaga o le itumalo. E le i masani lelei la ia nuu nei, e mafai ona o i itumalo ia, lea ua faatonuina e lau Matagaluega e o i ai mo le taiala. A o le taiala o le matua lelei lava lau Afioga i le Minisita. E toe tasi lava le mea lea e tau faatoatoai ai le manatu o le itumalo i le taiala, ona e o lava le itumalo ia e sue a latou alagatupe e faatino ai le faamoemoe lea. Ae pe le mafai e lau Afioga ma le Matagaluega, ona aumai sina auivi o tulaga e agai i ai itumalo, mo le faatinoina o le taiala lea. Ae ua matua lelei atoatoa, faafetai foi o lea sa fai foi le isi fonu i le matou nuu o Vaigaga i le vaiaso na tea nei, mo le faatauina o le faamai lenei o le Koviti. O le manaia ia o le presentation manaia le avatuina. E pau lava le mea na tau faaletonu, o le pese lea e fufulu ai ia aao lau afioga. O le happy birthday ae faapalagi toe faasamoa. E uma ifo le pese, masalo toetiiti uma i ai le tanevai lau Afioga i le fufuluina o lima ia. Ae vaai se pese puupuu, vaai se pese lelei. Ae o le manaia ia o le faatinoina o le polokalame, ua matua fiafia ai lo matou itumalo. Ae faamalo lava mo le tauatai i lenei tausaga ma lona faamoemoe.

Ona oo mai lea i lau uo, malo le soifua i lau Afioga i le tulaga o le tatou vaalele. E masalo o lona e i ina ia oe le tofa o le tulaga i le vaalele, o le a le fai atu se tala. O au foi ua leva ona ou i ai i le Kamupani vaalele, e pele ia te au le vaalele, ae o le manaia ia o le vaitaimi sa i ai le vaitaimi o le Polenisia sa matou i ai. E ui lava ina tele F.O.C ticket sa faaoga ae o la sa alu lava le vaalele ma tele ona vaalele e o. Na oo lava i le 747 le isi vaalele, avatu ai ma au i Amerika ou te alu e fai, ae uma le vaalele ae ou nofonofo ai o, lea ua ou toe foi mai i inei lau Afioga. Ae talitonu le agaga o lona e i ina ia oe le tofa. Aua ne i aumaia ni vaalele se lua, e le lavatia e tatou, ua lava se tasi, ina ia mafai ona tatou amata ai, ma se i tau... leaga e i ai le aufaigaluega a le tatou kamupani vaalele na i ai, o lea ua feoai solo faapenei. E tatalo mai i le sui

usufono, ae ou fai atu i ai, e faamalulu atu, ou te le o faia ni upu o le vaalele, ae talitonu le agaga o lena e i ina.

Ae po o le a sou finagalo i le auala o Falelauniu, ae talanoa ia ma le Minisita ma le CEO, fai po o le a le mea la e mananao i ai le LTA ae ave i ai, ae fai le matou auala lau Afioga. Aua ou te talitonu o oe lava o lo o i ai le tali.

Ona oo mai lea i le Afioga i le Palemia ma le Sui Palemia, o lena e lelei lava oulua, o lena e lelei lava oulua, e leai se mea o afaina ai. Lau Afioga foi i le Palemia, o au ou te faalogo ia oe, ou te ava ia oe, o mea e te mana o i ai, a i ai foi se faaletonu foi i le ta va nonofo ai, ia o au o lou atalii, o oe o lou tama, ae aua le otegia sooa, aua e pei o le mea lena, o lea e tau fai ai ma ou tau fefe ou te alu atu i lau Afioga, ae talitonu le agaga o lena e i ina le tofa ma le faautaga, faapea foi le tamaitai Sui Palemia, malo lava le tauatai. Masalo pau ia o nai manatu.

O i lau Afioga i le Fofoga Fetalai, ia alofa le Atua foai pea lou malosi e te toe sau ai i le isi faiga palota. E talitonu o lo o lava lou malosi, ia faamalulu atu foi pe a faapea o le a foi se tulaga o i ai, nisi e o atu ma lipoti atu au i lau Afioga, e leai, e leai lava sau mea leaga o faia, o lea lava ou te faufautua atu lava i ai. Ae ia alofa le Atua foai lou malosi. Pau ia o nai manatu, lau Afioga, o lea ua uma ona tali mai le auala o le mea pito i sili lena ona taua. Ae ia manuia lava le Fonotaga i lenei aso. Ia manuia foi le susuga i... aemaise le mamalu o le aufaigaluega a le Malo o lo o tatou faatasi i inei, ia manuia lava fuafuaga faale-malo. Ia faapena foi lenei itu, pau na o se manatu, faafetai lava.

FOFOGA FETALAI: Malo faafetai saunoa i le sui usufono mamalu o Nuu tu Taulaga i Sisifo, faafetai mo le saunoaga. Ma ua avanoa foi le Maota o le Palemene mo se isi sui usufono e fia saunoa. Tulai mai se sui usufono.

Manatua foi o le Palemene i le taimi lenei, o le isi itu e agaia le Malo, e pule faitalia le Fofoga Fetalai pe o le a tali loa le Malo i sui usufono ia e toa fa ua uma ona saunoa, ae faagasolo le tatou Tala o le Tupe.

Tulai mai le sui usufono mo Safata. Alo ia i le saunoaga lau Afioga i le sui mamalu mo Safata i Sisifo.

Afioga LEAANA RONNIE POSINI: Lau Afioga i le Fofoga Fetalai, e muamua foi ona faatalofa atu i lau Afioga. Faatalofa atu foi i lau Afioga i le Taitai o le Malo lau Afioga i le Palemia, le Kapeneta, faapea foi Minisita Lagolago aemaise foi lenei Itu o le Malu.

E faatalofa foi i le tapuaiga a Samoa i Le Ao Mamalu o le Malo, faapea foi le Sui o le Fono a Sui Tofia ma le loaloa o le tatou atunuu. Ae e fia fai atu so matou manatu e ala foi i le Tala o le Tupe ua faatulai mai nei, ae muamua ona faafetai i lau Afioga i le Taitai o le Malo. E muamua ona faafetai, ona o le faamai o lo o aafia ai le lalolagi atoa. O lea e maua tala o lea e ogaoga lava le faamai i totonu o le lalolagi nei, faalogologo foi i tala mai nuu mamao

i le taeao, o la e pei faatoa amata isi atunuu e pei o Initia ma nuu na, o la ua faateteleina i ai ma nisi atunuu. Ae o le agaga faafetai, e pei o la ta matau, e pei o le tatou atunuu lea na muamua fai le tatou tapu i le faamai. O le ala lea o le faafetai atu i lau Afioga ma le Kapeneta aemaise foi o le Komiti o faufautuaina lo tatou malo i le vave ona fai o tapu ia, o lea ua oo mai i le aso, e le i oo mai le faamai i totonu o le tatou atunuu. E le gata foi i lea, faafetai ai foi i le au faitatalo a lo tatou atunuu, e tatalo aua le tulaga faigata o le tatou atunuu o i ai. O le ala lea o le agaga faafetai i lau Afioga ma le Kapeneta i le malupuipui o lo tatou atunuu mai le faamai.

E pau lea o si a matou tuualalo lau Afioga, o le silasila totoa pea i ai, ne i tau maui atu le faamai, ae te i ua toe maua ai si o tatou atunuu. E momoli le agaga faafetai tele i le Afioga i le Minisita o Tupe aemaise ai foi le Ofisa Sili o Pulega ma le Matagaluega o Tupe i le tapenaina o lenei Tala o le Tupe. E matau lava o le vaitau lenei ua ogaoga ai le tamaoiga o le lalolagi atoa, aepeitai, o lea lava e gafatia e si o tatou atunuu le tulaga o le Tala o le Tupe. O le ala lea o le faafetai tele i lau Afioga i le Minisita aemaise le Matagaluega o Tupe.

Ona oo mai lea o se matou tala, e faasolosolo mai i mataupu taitasi, ua i ai foi le lagona o lenei itumalo. E faafetai atu i le Minisita o le Soifua Maloloina o lea ua matau ua amata ona faagasolo le tulaga o le faiga o ata, ma tulaga faapena i le falemai o le matou itumalo i Saanapu. Aua e talitonu lau Afioga ua talafegai foi ma lenei vaitau i le tele o faamai ua agai mai. O lea e momoli atu ai le agaga faafetai tele, o le a faatino lea faamoemoe, aua e talitonu e pei lava o le agaga e pei ona saunoa foi nisi sui usufono, e faaitiitia ai le agai mai i le falemai tele i Motootua.

Ona oo mai lea o sau faamatalaga i le Minisita o Aoga. Lau Afioga i le Minisita o Aoga, faafetai tele lava, i le tulai mai foi, e pei ona fai atu i le taimi ua sola, tulaga maualuga foi le tulaga tau aoaoga, e le gata i aoga Tulagalua, aemaise o Kolisi. I mea ia o le faasoasoina o faiaoga i totonu o aoga, e momoli atu ai le agaga o le faafetai tele i lau Afioga. O le isi mataupu lau Afioga, se i silasila ane lava, i lau lea matau i totonu o Kolisi, pe e le i oo i le taimi ua tataua ona faaulu ai mataupu tau Matata Eseeese, na ou faalogo lava ua tau amata i isi Kolisi, ae ou te le o iloa la pe ua amata ona faaulu pea... maua ou te iloa o le faigata i le taimi lenei o le utiuti o faiaoga e faatinoina tulaga ia, o matata ia i totonu o Kolisi. Ae silafia foi e lau Afioga ma le mamalu o le Maota, e eseese uma lava tomai ma agavaa o alo ma fanau. E i ai foi isi o le mafaufau, ae e i ai foi isi e lelei le faatinoina e o latou aao ma tulaga faapena. A amata la ona aao ai i le Kolisi, e oo atu i luga i le Matata Eseeese i le tulaga o Iunivesite ua i ai lo latou iloa ma lo latou silafia. I lau matau i lau Afioga i le Fofoga Fetalai, se i toe silasila foi lo tatou Malo i le mea lea e ave ai ia tatou avanoa a le tatou Malo mo sikolasipi e ave i fafo ma tulaga faapena. Aua o lea e tau matau atu, o lea e ave lava i tausaga uma tausaga uma, ae i lau tau matau i le... e alu a ae lilifa lou mafaufau i tulaga

o mea ia o Aoga faa-Matata Esee. E tatau foi ona ave i ai le faamuamua a lo tatou Malo i isi taimi. O lau matau, so o se mea lea e fau i totonu o le atunuu leni, e manaomia lava matata eseese i tulaga i agavaa ma le faatinoina foi lea. E taatia ia le manaomia o tatou fomai aua o mea ia e manaomia, o tatou inisia foi ia, inisia lautele i le atinae. A o mea ia tau matata i lau lea faitau, ua ave foi i ai le tatou faamuamua i le atinae o le tatou atunuu lautele, se i silasila ifo i ai lau Afioga, ne i te i ua lilifa tele i isi poto lautele. Ae pe ua tele tele foi isi agavaa ia e i totonu o le tatou atunuu, ae tau faapaleni faapena le... o lau lea vaai i tulaga o mea tau matata eseese.

Ona oo mai lea i le vaega lea o le Siosiomaga. Faamolemole lau Afioga i le Sui Palemia, aua e pei o le mea lea o le suiga o le tau, e pei foi ona lauga i se taimi ua sola, se i silasila ifo lau Afioga i taligalu. Aemaise foi lo matou itumalo, e pei o talosaga ua uma ona faataatia atu, se i silasila ifo i ai lau Afioga i tulaga o taligalu e pei ona matou taua, ua siitia lava le suatai, lofia ai le eleele ma aia atu ai eleele ua afaina ai le tele o fanua o lo tatou atunuu.

Lau Afioga i le Minisita o Galuega, ou te faafetai atu i lau Afioga, o lau matau, ua tele ina faata uma auala galue o afioaga taitasi o le tatou atunuu. O lea e momoli atu ai le agaga faafetai tele. E pei foi ona tuualalo foi i isi taimi, e i ai nuu e tetele o latou laueleele toe tele fua o faatoaga e maua mai ai. Pe le ua oo foi i se taimi e tatau ona tai faalua ai... aemaise lava nuu ia, e lua ai ni auala galue, ae ou te talitonu foi e fua mai i se molimau mai le Minisita o Faatoaga, le mea o lea e tele mai ai fua o faatoaga, aemaise lava faatoaga talo ma mea faapena, e manaomia le tele o le laueleele e fai ai, e manaomia foi nai isi auala e faatino ai. Ae ou te talitonu o lea ua auala uma lava auala galue uma ia ua faata. Ae pei o le talosaga lena i lau Afioga, ona o leni foi itumalo, e pei o le matou nuu o Saanapu e pei ona ou taua.

FOFOGA FETALAI: Tulai mai le Minisita o Galuega, Felauaiga ma Atinae Esee.

Susuga Hon Papaliitele Niko Lee Hang: Lau Afioga i le Fofoga Fetalai, e le faalavelaveina foi le saunoaga matagofie a le sui mamalu, ae na o se mea lea e fia faasao. Ne i mea ane ua faapea le mamalu o le atunuu o auala galue, ua faata uma auala galue. E leai, o le polokalame lea e i ai, o auala galue e 1km o le ta, ae 2km o le fola o le maamaa ae lola faamalo. Leaga o la e faafofoga mai le atunuu, aua o isi auala ua fai, e le o ta uma lava, ua na o se vaega e ta. Ae ne i mea ane ua faaseseina le faafofoga mai o le mamalu o le atunuu, faapea e tatau ona faatania uma o latou auala. O le polokalame lea e i ai, se i sefe se tupe ma tele ni auala galue e fai, 1 km e ta ae o le isi 2km na ona tanutani faamalo. O le tulaga lea lau Afioga, faafetai.

FOFOGA FETALAI: Pe ua maua atu....

Afioga LEANA RONNIE POSINI: Faafetai tele i lau Afioga i le Minisita, o lea foi ua malamalama atu i lea tulaga ua e saunoa i ai. Na ona talosaga atu i lau Afioga i le Minisita, e i ai le laina moli na e i uta o le matou nuu i Sataoa, e i ai nai aiga, lea sa ou talosaga ai foi i lau Afioga, se i silasila totoa ifo i ai lau Afioga i le Minisita.

O le isi mea lau Afioga, o le tulaga lea o vai i nuu i tua ia matou, o le lelei ia o le teuina o laau ia e i tafatafa o laina moli, e saogalemu aua e talitonu a oo i le taimi e leaga ai le tau, e tele ina sefe ai le faaleagaina o laina moli ia. A o lau tau matau i le talafatai i Apia, o le tele ia o laau e faalavelave i mea ia o laina moli. Si tamai matagi lava ma touulu i luga o laina moli, ma faaleagaina ai. Pe o le a se fua foi lea a le Matagaluega e talosaga i aiga ia, e kilia ese laau ia, aua afai e faaletonu ai ona e mumusu, e tatau ona totogi e latou le tulaga o le faaleagaina o laina moli.

FOFOGA FETALAI: Tulai mai le Minisita mo Galuega, Felauaiga ma Atinae Eeseese.

Susuga Hon Papaliitele Niko Lee Hang: Mo le faasaoina o le taimi o le sui usufono mamalu, ona o le tulaga lea na lagalaga mai mea ia...o le tulaga lava lena o lea e faataatia ai galuega ia, laau ia e latalata i uaea eletise malolosi. O la foi ua faaoga e le EPC ia konekarate, o le latou matafaioi lena o le o e vaai, silasila po o fea ni uaea eletise o latalata i ai ni laau ma tatipi. O le tulaga lena, a faapea ua e tagai e i ai ni laau i le tou afioaga o lo o latalata i le uaea eletise ona logo mai lea. Ona o le galuega lena e faatino e le EPC ma le konekarate lea ua faaoga e faia le galuega lea, ma le faaloalo lava.

FOFOGA FETALAI: Malo. A mea foi le saunoaga a le sui mamalu o la e faafofoga tapuai mai le atunuu, o le isi mea e fai ma amio a aiga e toto faapena laau, ae augata e aveese pe a tetele. O le mea lava o le tofa mamao e faaoga, afai e manao i le eletise, puipui ifo le uaea eletise. Tulai mai le sui usufono, afai o le tou itumalo lena e fai ai le mea lena, ia se i faatonu atu le tou itumalo.

Afioga LEANA RONNIE POSINI: Faafetai tele i lau Afioga i le Fofoga Fetalai, masalo o na e maua mai e lau Afioga o lea ou te tau atua foi ia matou lea e mamalu ai ia... ae pei o lau matau lea i le talafatai o Apia. Aua e pei o lea e tupu iinei i Apia, ae le o tutupu i le matou itumalo ma itumalo uma i tua ma Savaii.

FOFOGA FETALAI: O lea e tau fesoasoani atu, aua e tasi lena tilotilo a le sui usufono, o le logo i ai. Saunoa mai le sui usufono.

Afioga LEANA RONNIE POSINI: Ona ou oo mai lea i le Minisita o Faatoaga, faafetai tele i lau lea matau, e pei ua avea le faamai lea, ua toe galulue ai lo tatou atunuu i mea tau faatoaga. E pau lea o le faafetai tele, e pei o lea ua iloa e tagata, ia aua foi ne i o tatou faamoemoe tele i o tatou aiga mai fafo. O lea e tele fua o le eleele e tua i ai lo tatou atunuu. Lau Afioga na ma malaga ma le isi sui usufono i Ausetalia i le amataga o le tausaga nei. Ona ma o atu lea, ae te i ua alu si faletua lea na agai atu, alu atu ma lana... vae atu lava le paia o le Palemene, alu atu ma lana cooler ia, avatu lea faaleaogaina uma i ina i le malaevaalele. O le uiga o lau tala, e pei e le o matuai lava se taimi e fesootai ai le ofisa lea, vaega o le faaasu ma le mamalu o le tatou atunuu, i mea e mafai ona ave i lea taimi mai lea taimi. Aua o atunuu ia o Niu Sila ma Ausetalia, e tele ina agai i ai lo tatou atunuu, e pei e suisui mai taimi... ae te i ua ma fesili atu ai, ae faapea ua faatapulaa le mamafa o cooler ia e avatu i fafo. Lea na faaleaogaina uma ai e Ausetalia. O le uiga o lau tala, o le a le mea e le ave...pe ave i kamupani vaalele ia e faia pasese, pe ave i ai le lisi lea i taimi uma e avatu i ai. Aua e o atu la tagata o le a o malaga, ae o atu foi lea e toe faamanatu mai ai i ina ia mea, na e mafai ona faataga mai i lea atunuu ma lea atunuu, aemaise lava Niu Sila ma Ausetalia. Aua e pei e suisui lava ia latou faiga e fai ai mea ia... aemaise lava mea taumafa. Ua faaleaoga atoa ai ia taumafaiga a nai o tatou aiga pe a malaga atu i fafo.

Ona oo mai lea o se manatu i le Ofisa o leoleo, falepuipui. Aua o lea e pei ua vaavaai e le Ofisa o leoleo mea ia tau taavale. Sa ou taua foi i le isi taimi, o mea ia o taavale ma o latou moli sulu. O le mea moni lava i lau matau, o lea e faateteleina le mea lea. E i ai le taavale na ou pasi atu ai anapo, ae pasi atu i luma ae ola mai moli sulu foi ia i tua i le pito i tua, e matua sesega ai tagata ia e mulimuli atu i tua, se i silasila totoa ifo i ai le Afioga i le Komesina ma tulaga o mea ia o moli ia e faasesega i luga o le auala. E le gata i lea, o taavale saosaoa, o le auala lea agai mai ia matou i Aleipata, sau i i Lotofaga, Falealili, ma agai i Siumu Safata ma Lefaga ma agai atu i le malaevaalele, o i lea e ui atu ai ia taavale e agai atu i le malaevaalele. I lau matau i le tuneva o le po i isi taimi o le saosaoa ia o le o taavale i ina, aua e pei o i lea e alo mai ai ia le itu lea i Sasae e agai atu i le malaevaalele ona e vave. Pe le silasila totoa pea e pei ona taua muamua foi pe le ua tataua ona faatutu ai ni mea ia o pueata foi ia e pue ai le saosaoa o taavale, i le tulaga o le feoaiga o taavale.

Ona ou oo mai lea i le falepuipui, o le taimi lea na sosola ai i tua pagota ia, i le taimi lea na sosola ai, na maua ai foi le taimi e faafetai ai i lo matou itumalo. Aua na logo atu loa matou, o nuu uma lava o lo matou itumalo na agai ifo e fono taulelea ma tausaili le mea na oo atu ai pagota ia na o atu. O le agaga foi lea i lau matau, o le taua lea o le aganuu lea a tatou lea e taumafai e faamamalu ia le tatou aganuu. E tasi lava le leo na matou aoina uma ai lava

ma taulelea ma matai e oo lava i le isi aso omatou leoleo ai i le tausailiga o pagota ia.

E pau lava le mea o le agaga faafetai, ona matou te le i maua ni pagota. Ia ae o le mea moni lava ua faamatamataita uma lava tagata i le mea aua e le faigofie le tali mai o o tatou afioaga i tua. Ae na uma ou sau matamata i le falepuipui, ou sau ou matamata, se i silasila ifo lava lau Afioga i le Minisita, e i ai mo loka na e loka ai le gate tele lea e tatala faatoa e ulu ai i totonu o le falepuipui, se e pei lava e taugofie ai le loka lena e loka ai faamolemole. Na ou alu atu lava ou matamata ou fai i le isi leoleo i le aso lena ou fai ai. Se i silasila ifo i ai lau Afioga pe le manaomia le suiga o loka na e loka ai le tatou falepuipui i le main gate lea e o ai i totonu faamolemole lau Afioga.

Lau Afioga i le Minisita, e tasi lea mea sa ou taua i le amataga o le Paeaiga lena. Aua o lea ua matau ua le gata i falemai ae o tulaga o faleaoga ia ma le tele foi o maota, faletalimalo la e i ai, po ua le oo i se taimi ua tatau ona faatu ai se Ofisa o Tinei Mu i le agai lea i le itu i Saute lea, le taoto lea agai i Lefaga, Safata, Siumu ma Falealili. E mafai foi ona au le auaunaga lea i Aleipata, pe le ua tatau ona faatu ai se Ofisa o Tinei Mu i ina, aua e talitonu, o le itu atoa lea i Saute o Upolu, ia ua tele foi atinae aemaise foi faletalimalo, e mafai ona laveaiina mai i ni malaia i le afi ma tulaga faapena.

O le isi mea ou te fia taua lau Afioga o le mea ia o tagata ia e matau pea i mea ia o soligatulafono ia e mo laau faasaina. E momoli lava lou agaga faafetai i le Komesina o Leoleo ma le latou Matagaluega, e ta te vaai atu lava ma lota alofa foi lea i le le saogalemu o tulaga o mea faapenei. O le mea o le le saogalemu o nai leoleo, ae o leoleo o malu ia. Ae o lea ou te vaai atu i luga o TV i aupega ia e maua mai i tua o le tatou atunuu ma laau faasaina, e tatalo lava i lo tatou Malo ia matua faamamafa le faasalaga i tulaga ia. E pei o se mea o lea ua tupu lava i totonu o lo tatou atunuu le mea o le toto o le laau faasaina i totonu o le tatou atunuu, ia ae momoli ai le agaga faafetai tele i le Komesina ma le Ofisa o Leoleo i le tulaga i le latou taumafaiga e taumafai ia tinei ia mea o laau faasaina.

Ia ona oo mai lea i le Ofisa lea o Tina ma Tamaitai, se i faamolemole lava lau Afioga i le tulaga lea o Sui o Nuu ma Sui o le Malo. O le tele lava o auala lea ou te vaai ai foi lea, mo pa laau foi ia ma pa aute foi ia e tutu autafa aemaise lava le talafatai i inei i Apia. Ua tau le sao taavale i tua i mea ia, ia mo pa aute foi ia ua o ifo lava i luga o le auala foi lea. Se i silasila ane e lapatai ia Sui o le Malo ma tulaga faapena i mea o pa aute mo le saogalemu foi o le feoaiga o le atunuu i luga o ala televavave.

FOFOGA FETALAI: Toe 2 minute o le sui usufono.

Afioga LEANA RONNIE POSINI: Faafetai tele o lea o le a tau faamaea atu.

Lau Afioga i le Minisita lea o le MCIL, o tulaga o mea ia o fanua ia e matau le tele o fanua ia e lisi, aua ou te matau isi fanua ia e tai 50 eka e lisi atu ai, ae e pei e foliga mai e le o i ai ni tulaga o la e faatoa, e le o faatoaina foi lea. O lata autilo i le taimi lenei, e toatele lava tagata o lo tatou atunuu e fia galulue, e fai ai nai... pe toe faalaitiiti mai pe tai 5 eka e faapoloka faapena, ae toe lisi ai ni isi o le mamalu o le atunuu o lo o naunau i le tulaga e fia galulue o faatoaga. E le gata i lea, e tele lava mau atinae e mafai ona faatino ai. O lea e tuu atu ai i lau Afioga.

Ona oo mai lea i mataupu ia tau aperatureniti faamolemole lau Afioga, aua o lea ou te matau sa ou i ai foi i totonu o le Fono Faatonu lea i mataupu ia e tau o le Grade 2 ma le Grade 1 lea e fai e le MCIL. O le mea lea o le Apprenticeship foi lea i lau Afioga, aua e pei o isi tagata e pei ua agai i totonu o polokalame ia o le Grade 2 ma le Grade 1, e pei e puupuu le taimi e aoga ai. Ae o le mea lea o le Apprenticeship e 4 tausaga e aoga ai. E pei o isi tagata ua oso ai i i ia tau lava ina ia maua ai se tusipasi, ae e pei sa i ai le taimi sa i ai le faaiuga a le Fono Faatonu, e pei ua tataua ona faataatia ia polokalame ia, ae o uma e aoga i le Aoga lea Faaapertureniti i le 4 tausaga.

Ia ona oo mai lea i le... e toe tasi lava si mataupu lea faamolemole lau Afioga i le Fofoga Fetalai. Ua i ai foi nai tagata o lo matou itumalo, ua agai mai i le mea lea... se o le mea foi lea o le faaliliuina o tamaiti mai i matua faaliliu i isi matua. Ua o latou omai ia te au foi lea e manaomia se fesoasoani, o le taugata ia mo pili ia e fai ai. Fai mai e oo i le tai \$2,000 pe a faaliliu se tamaitiiti foi lea. Ia ae e pei o lea ou te iloa e i ai lava le vaega faapitoa e pei e na o loia ia latou te faia. Ae e pei ua tau fai mai i pili foi ia, ua oo i le tai \$2,000 e faaliliu ai. Pe e leai se isi fesoasoani a lo tatou Malo i lea tulaga foi lea i le faiga o mea ia o pili ia. Aua e le gafatia uma foi e nai isi matua e limavaivai ia le tulaga o le faaliliuina o alo ma fanau i le tulaga faapena.

Ia ona faaiu atu ai i se manatu o lenei itumalo, e momoli atu ai le agaga faafetai tele, ia i lo matou itumalo i le tapuaiga e maua ai so matou manatu e tautua ia aua lo tatou itumalo ma le Malo. Manuia tele le Fono.

FOFOGA FETALAI: Malo, ia malo faafetai tapuai mai le itumalo. Malo i le saunoaga matagofie a lau Afioga i le sui usufono mamalu, ua avanoa foi le Maota Fono.

Ia na ona tau olioli mai o le itu lea i tai ae na ona tulai mai a pei e tau, ia tulai mai le tausala lea i le itu o le Maota, le Afioga i le sui usufono mamalu Gagaiformauga Nu.3.

Afioga FAAULUSAU ROSA DUFFY STOWERS (Gagaiformauga Nu.3): Faafetai i lau Afioga i le Taitaifono mo lou avanoa, e faatalofa atu i lau Afioga faapea le mamalu o le Maota, faapea foi le faafogafoga tapuai mai a le mamalu o le tatou atunuu i ona tulaga faalupe. Ia ae o lenei taeo ia ma le talanoaga o le Tala o le Tupe, faataatu i le tatou Paketi, ia e momoli

atu le faamalo i le Afioga i le Minisita. E faapito augafa foi le faafetai i le Afioga i le Palemia ia ma le saofaiga a le Kapeneta, Ofisa Sili o Matagaluega ma Faalapotopotoga Tumaoti a le Malo. Aua po o le a lava le lelei o le Paketi e i ai, a le lelei le faatulagaina ma le faatinoina o tiute ma galuega fai e le mafai ona ausia.

Ma o le agaga lena e momoli tele atu ai o le faamalo ma le faafetai i le tauatai, faafetai le onosai, faafetai le alofa i lo tatou atunuu i le faatinoina o outou tiute. Ma o le taunuuga foi o le Paketi ma le Galuega faatino foi a Matagaluega ma Faalapotopotoga Tumaoti, e taunuu lava i le taunuuga foi lea e taunuu mai ai le lipoti foi lea faaletausage a Matagaluega eseese ma Faalapotopotoga Tumaoti i le mamalu o Komiti Faa-Palemene. Ma o i ina foi o lo o matauina ai le faatinoina o galuega a lo tatou Malo, ona o i ina e mafai ai ona atagia ai po o ausia le Paketi, pe le o ausia foi le Paketi mai lea tausaga ma lea tausaga.

Ma o lo o matauina lava e lou sui usufono, o lo o siitia lava le tulaga o le auaunaga o lo o faamatuuina atu i le atunuu i lea tausaga mai lea tausaga. Ma o le Paketi lea ou te talanoa ai o le Paketi lea i le 2019, ia o la na maualuga ia tupe faatatau lea fuafuaina. Ae ina ua faagalueina ia le faatinoina a Matagaluega ma Faalapotopotoga Tumaoti, e matauina lava e lou lava sui usufono le lelei o le faatinoina o galuega, ia alu lava i luga o le Paketi po o le taumafai e faaitiitia tupe alu. Ma o le auga o le faamatalaga, ua matauina ai Tausaga Faaletupe e lua talu ai, o lo o maua ai ia faasiliga. Ma o lo o sii foi i luga ia faasiliga mai lea tausaga i lea tausaga. Malo le fai o le faiva. Malo le galulue. Faafetai lava le alolofa i lo tatou atunuu ma le faasoasoina o tatou tupe, e moi lava e lelava, o la e mafai lava ona ausia.

Ia ona oo lea o se faamatalaga i nai fautuaga laiti, e le tele lava se faamatalaga i lenei taeao aua o lea ou te talitonu e toe maua foi le isi Fonotaga, ia o i ina la o le a fai ai ia lauga foi ia faataupou, ae o lea o le a ou lauga foi la faataupou mai lou itumalo o Gagaifomauga Nu.3 sui usufono aloaia o le HRPP, aua o la ua tutoatasi ia le Afioga ia Laauli.

Ia ona oo lea o sau faamatalaga foi lea i nai fautuaga laiti i Matagaluega eseese. E talitonu ua uma ona faaleoina e ni isi o sui usufono mamalu ae na ona toe faamamafa atu i ai. Faafetai i lau Afioga i le Minisita o Fesootaiga, o lea ua talitonu o la ua faagasolo galuega ni isi nuu o si ou itumalo, nai ou nuu ia e le oo i ai ia auaunaga ia, ae o lea e matau atu o lea ua faataunuuna i ai. Talosia aua o lea ou te toe alu i le vaiaso fou i le Komiti ona oo lea i ai e faamaonia lau saunoaga.

Ae na pau lava o lea, e toe faamautuina pe mafai ona toe silasila foi lea i le tau lea o le tatou uega lea tafailagi lea e faaoga. O lo o matauina lava le taugata, ae fai lava sina tuai.

Ia o le Minisita o Aoga, ia e ala atu lava iinei ia le fautuaga ma se tuualalo. Ma sa faaleoina foi e lou sui usufono ae ou te toe faaleoina foi lava, i le Minisita o Aoga, ia ou te talitonu lava o le utiuti o le seleni. Ia ae o le luitau

foi lea e tuu atu i le Afioga i le Palemia ma le mamalu o le Kapeneta, pe a pe a toe silasila lava i faiaoga o lo o galulue i mission schools, ia o aoga ia a Ekalesia, i le totogiina ia o faiaoga, ae aua ne i toe faamatuuina i ai se seleni, ae pea pe a silasila i ai pe mafai lava ona faalaugatasia ma faiaoga i aoga o lo o faiaoga i Aoga a le Malo, ona ua vaia lava aemaise lava le vaitau leni ona ua matua utiuti lava seleni a nai aoga nei ona ua le lava le tala o le tupe. Ia atoa ai ua le mafai ona fai ni suegatupe a matua aua o lea e fai ia le lockdown. Ia ae na ona tuu atu i ina, pe a pe a toe silasila i ai aua o tamaiti uma lava o lo tatou atunuu la e aotauina i totonu o aoga nei.

Ia ona oo atu lea i le Matagaluega o Tupe Maua, ia e leai lava se... o lena ua uma ona avatu le faamalo ma le faafetai aua po o a lava mea uma ia e fai ae le lava le aoina o le tatou seleni, e faigata foi ia fuafuaga a lo tatou Malo. A o le fautuaga, ia matua lelei ia le faatulagaina o le tatou system fou foi lea e maua mai talu ai o lena ua faataatia, ina ia mafai pona pueina ai vaega e ao ona pueina i oloa ia e sau i totonu. E le gata i oloa uma ia e sau i totonu, ae faapena foi ma isi ituaiga mea ia e mafai ona ofi mai ai i totonu ia e faasaina e lo tatou atunuu.

Ae o lau Afioga foi lea e i ai le Matagaluega o Leoleo e fesootai atu ai ma se faamatalaga i le vaega lea o fualaau faasaina lea e ono ofi mai borders, pe mafai ona faamalosia ai pe siitia le vaega lena ina ia mafai ai ona tapue tulaga ia.

E faapena foi i le Matagaluega o Leoleo. Ou te talitonu e le na o le mariuana lea e... o la e o lo o i ai ma isi fualaau mamafa na e i ai po o hard drugs ina ia mafai ona maua lelei po o... aua o la e ou te iloa o lea e maua iinei i Samoa, ae po o fea la lea e maua iinei i Samoa ae po o fea la lea e aumai ai aua o lea e lockdown uma borders. Tau mai ai loa i ina, o lona uiga o la e fau i totonu iinei. Ia na ona faaoolomaau atu i lau Afioga, o le a se isi ituaiga auala e mafai ai ona tapue vaega ia, ona o manumanuga i fanau lalovaoga a le atunuu o lo o tuputupu ae e ono aafia ai lava lo latou soifuaga.

Ona oo atu lea o se faamatalaga i le Afioga i le Minisita o Leipa. Ou te talitonu foi lava o le faamatalaga foi lea sa tuuina atu foi talu ai, ae momoli le faafetai i le lockdown leni na fai, ona ua aoga le lockdown ua vave ai ona tapuni faleoloa foi ia tetele a ua maua ai loa le avanoa o nai faleoloa laiti. A o faleoloa laiti ia, o le tele o le mamalu o le tatou atunuu o lo o faatinoina le auaunaga lena, e mafai ai ona maua ni a latou seleni ma vaega ia. Ma o le fautuaga, e mafai lava ona toe silasila lau Afioga i le Minisita ma le mamalu o le Matagaluega, ina ia mulimulitaia taiala ua faataatitia, e pei o le monitoring lava, ia i ai lisiti i faleoloa uma, ia i ai... po o lelei fua e faaogaina i totonu o faleoloa, aua pei o i lea e agai i ai le toatele o le mamalu o le atunuu i nuu i tua i mea o lo o moomia i le latou soifuaga faaleaso.

Ona oo mai lea o se faamatalaga i i Faalapotopotoga Tumaoti lea e i ai le EPC ma le Suavai. O si ou talitonuga lava na o au, ua matauina foi lava ua essential services foi le... it's a necessity le power po o le eletise. Ae ou te

matauina, o lo o aiaia galuega faatino a Faalapotopotoga Tumaoti nei i aiaiga a le Matagaluega o Faalapotopotoga Tumaoti nei a le Malo. O le uiga o le faamatalaga, e i ai le latou return foi lea e tatau ona maua i lea tausaga i lea tausaga. Ma o le mea la e agai i ai le faamatalaga, ua agai la le EPC ma le Suavai ina ia ausia le restriction lea e agai e ave i totonu o le Malo, ae pei ai lava ua siitia atu ai loa ma le tau o auaunaga ia. A o ita ma lota ita alofa i le mamalu o le atunuu, ou te talitonu o lena foi tou te alolofa foi i le mamalu o le atunuu, pe mafai ona tilotilo muamua e faamalie le auaunaga ma le kilivaina i tua ae faamulimuli le return lea, aemaise lava i auaunaga ia o le EPC ma le Suavai taumafa. Ia, na ona tuu atu i ina o nai motugaafa na, ae le fai a'i.

A o le i see ese, le Matagaluega lea o Leoleo aua o lea ua i ai tulaga ia o taavale, o le tele foi lava o au lauga e fai ou te talanoa lava i pasi nei ma taavale. Ae i le mea lea na matou i ai nei i Savaii, oka, ou te le iloa po o faatino le auaunaga a le Matagaluega o Leoleo lea i le pasiaina o taavale, aemaise lava o pasi i o i Savaii, aua o le tele lava o pasi pe feoi mai pe tasi le moli i tua, pei e faapena ae ta te le iloa la pe na faapefea ona pasia le pasi lea e felauai ai le mamalu o le atunuu. Seiloga e tupu le faalavelave faatoa iloa ua agai i ai, ae po o faatino le auaunaga lea ma le faamaoni i le faiga o tiute ia i le pasiaina o taavale. E oo i mea ia o pu o pasi na ta fai atu ai muamua, tulou lava lou gutu ma le afi, matua ova a le le mafaufau o pu a isi pasi. Ae pe mafai lava ona tagai ifo i ai lau Afioga i le Taitaifono i lena tulaga.

I le vaega foi lea ua galo foi, o le Matagaluega o Aoga lea na maua na saunoa ai le isi sui usufono mamalu, i mea ia o mataupu foi ia e pasi mai uta i le NUS ae le taliaina i le USP, even our USP o le Iunivesite a le South Pacific, e tatau lava ona i ai sina sootaga foi lele e mafai ai ona talia e le USP ia mafai ona cross credit mai ai mataupu mai o ia tatou i i le USP. Ia, ou te iloa na o le pau ia o nai motugaafa a si ou sui usufono.

A o le isi vaega mulimuli loa la lea e fia avatu, o le faalauiloa lea e faaoga e Matagaluega i a latou faalauiloa i le mamalu o le atunuu, o le tele a o auaunaga ma mea faatino e ese ma le lelei, a o le toatele o nai tagata i nuu i tua, e le oo i ai. Ae a mafai ona kiliva lelei i tua le faalauiloa i auaunaga eseese o lo o available mo tagata lautele, ona manaia loa lea i le tagatagai mai foi ma le nonofo ai o le mamalu o le tatou atunuu i nuu i tua.

O le fautuaga mulimuli, se i tagatagai ifo lava po o ai le Minisita e i ai le vaega lea. E moni lelei le saunoaga lea i mea nei o fees a Faalapotopotoga eseese po o institutions like Lawyers Society po o le au suetusi ma vaega faapena, ou te iloa o le au suetusi e reasonable lava latou fees o lo o i ai. Ae na pau lava o lea o le vaega lea o loia e fai lava si tetele foi lea pe mafai ona silasila i ai pe i ai se auala e mafai ai ona maua ai se fesoasoani e toomaga mai i ai le mamalu o le tatou atunuu.

Ia na pau lea o nai motugaafa a lou sui usufono, ae faafetai i si o matou itumalo, si o ma itumalo ma le Afioga ia Laauli, i le paia o le Faletolu faapea foi le Aiga Sa Tupua ma le Aiga Sa Malietoa, ma si ou nuu i o i le Aiga o Mavaega, le Falelima o Saeseese faapea lau Fetalaiga Pao, ia faapea foi le mamalu o le Aiga Sa Levi o lo o nonomanu i totonu o lo tatou itumalo aua le manuia. Malo tapuai, faafetai le tapuaia foi o faiva o lo o alo atu i ai si ou nei tamai sui usufono. Ma lou faaaloalo tele lava, faamanuia mai le Atua i le Fonousu a Samoa.

FOFOGA FETALAI: Malo faafetai. Ia, ua atoa lelei lava mea sa e finagalo i ai aua lou itumalo, malo faafetai. Ua faafofoga mai foi le itumalo i le latou tapuaiga, o le sui usufono lena o Gagaifomauga Nu.3 lea faatoa maea ona saunoa.

Ia tulai mai se isi sui usufono e saunoa o lea e tele le tatou taimi. E manaia foi le ta nei toe tala maea taeao i le taeao, ae a uma nei lava, e uma nei lava pe a...

O le mea foi pei a oo soo i tua i le itumalo pei a faasee soo le itumalo, ae manaia le alu sao lava i le Tala o le Tupe. O la e foi e silafia lelei lava e nai toeaiaina...

Ia, e manaia le felafoai, ioe. Ia tulai maia le sui usufono mo Anoamaa Sasae. Ua fia faalogo, se leaga o tofiga e faapena. E faigata le paia o Aiga, faapea foi le Saofaiga, ae a le Toaono ma tootoo o Lalogafuafua. Ia tulai maia, fetalai ia oe Lufilufi pe saunoa foi Aiga.

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU (Anoamaa Sasae): Faafetai mo le faatauanau i lau Afioga i le Fofoga Fetalai. Sa matou nofonofu lava ma mataitu le tualumaga o le tatou Fono, ae ui i lea, o le a faavavevave atu se manatu e tusa ai foi ma le faamoemoe o lo o i lumamea nei.

E fia faapai foi se matou tala i le tapuaiga mamalu a Samoa, mai lava i ona ao seia oo i ona iu. E pei lava ona malie, e leai se vave na te toe autalaina paia ma sa ma mamalu o le atunuu ua uma ona tofi. E talatau Toga ae talatofi Samoa.

E faapai atu foi i le tapuaiga i le paia o le aufaigaluega totofi a le Atua, o e foi o lo o faanonomanu aua se manuia to i lagi aua le tatou atunuu i le ola faaleagaga. Malo le faitatalo, malo faanonomanu i le Atua.

Ia, le tapuaiga a Lana Afioga Mamalu i Le Ao o le Malo ma lana Masiofo, Sui o le Fono a Sui Tofia, le paia foi o le faigamalo i lau Afioga i le Palemia, le Kapeneta, lau Afioga i le Fofoga Fetalai ma sui usufono mamalu o le tatou Palemene. Malo le folau, malo le soifua manuia, malo le faatoatoa i tiute ma faiva aua le valaauina pei ona tatou i ai i lenei foi vaitau. E pei lava ona saunoa nisi, e le o toe umi foi le tatou Paeaiga. Ae a tatou tu ma vaavaai i

tua i le taitaiga mai o le sa o le atunuu, ia, e le i faapea na see loa le tatou malaga, e leai, o lea lava ua tatou maitauina o lo o i ai lava foi faafitauli o feagai ma tatou aemaise foi o le lalolagi atoa.

A o le upu ou te fia faamanatu pea ia Samoa, o le upu o le Tusi Paia faa-Peretania, “Honour God and He will honour you.” A e faaaloalo i le Atua, e faapena foi ona faaaloalo le Atua ia te oe. A e faamuamua le Atua, e faapena foi ona faamuamua oe e le Atua. O le vaavaai lea Samoa leaga e i ai isi taimi tatou te nofonofo ae tatou te le iloa manuia ia tatou te nofonofo ai i luga. Manuia ia o lo o i ou aao ma ou lima i totonu lava o lou siosiomaga ma totonu o lou atunuu, ia lea ua tatou vaavaai i ai, tasi lenei atunuu e ui ina itiiti, ae tatou te maofa i le alofa o le Atua.

Ona ou matauina lea i lenei foi vaitau pei ona i ai nai taimi na tatala atu ai nai mea ia na tatala atu nei, e le i leva nei lava ona tatou faanonomanu i le Atua, ae na ona tatala lava o mea e te toe vaai lava i le tagata e toe foi lava i le mea lea, ua leva ona fia o isi se i fai le olaga lava lea o le tagata ma ona tuinanau ae faagalologo le alofa o le Atua na taitai mai ai le atunuu. Samoa aua ne i galo ia te oe le Atua, ioe. O ia lea o le maluapapa, o ia lea e manuia ai mea e te faia. O mea uma ua tatou vaavaai i atunuu, e faitau... se ou te maofa i fuainumera e talanoa ai tagata, ua trillion, fia triliona ma piliona ua a? Ua fememeai, ua luluina mea uma i lenei vaitau o tatou ola ai, ua luluina e le Atua le lalolagi ona tu mai lava lea o mea moni, tu mai lava mea moni e tatau ona aga i ai le tagata a ua toulu ese mea foi ia e fai, leaga o mea e fai e lima o tagata, o mea ia e mavae, a o mea e fai e le Atua, e tumau e oo lava i le faavavau. O oe ma lou aiga, o oe ma lau fanau, o oe ma lou siosiomaga e agai lou faamoemoe i le Atua o i ina e manuia ai. E te vaai atu lava i le lalolagi, se ua avea le mea e sao ma mea sese, ua avea le mea sese ua fai ma mea sao. Ua faataaloga i vai lenei mea, mea a le lalolagi. O lea ou te fai atu ia oe, o mea e mavae ma mea e le aoga. O le mea lea Samoa e, afai lava ou te le oo i le Tala o le Tupe, ua lava a lea, na o le pau lava lea, a ia faamuamua ma e faaaloalo i le Atua ona faaeaea lea o oe e le Atua. Leaga e fai mai le faamanuiaga a le Atua, o oe o le ulu, e le o oe o le siusiu, o oe e te pito i luga, e te le pito i lalo. Po o le a lava le tele o le oa ma le tamaoiga ma le malamalama o le tagata, e leai se mea e o lua ma lo tatou faatuatuaga lea, leaga o lea e faavaepapa i ai Samoa. O lea e faamautu i lo tatou Faavae, o lea ua i totonu o le Faavae.

I le taimi na agai mai ai le faamai, sau loa le tatou Taitai, le Palemia, “Samoa, fai le tatou anapogi.” O i na ou iloa ai, o lo o tatou i ai i se taitaiga o le tagata e faamuamua le Atua. O le tele o isi taimi tatou te faatali se i omai le aufailotu fai mai, fai le tou anapogi. Ae ou te manatua le taua na tau ai le tama o Iosefatu, ina ua faasagatau mai Malo e tolu, fai mai ua omai le nuu fai mai le tupu, fai le anapogi, fai le anapogi. O le taua fai mai na o le pepese lava o le nuu o Isiraelu ae manumalo le taua. O le mea foi lena ou te fai atu ai, tatou te manumalo lava pe a faamuamua le mea e tatau ona faamuamua.

O lau faaaloalo lea ua ave i le Atua, o le mea lena e tatau ona tatou faamuamua.

Ia, lau Afioga i le Fofoga Fetalai, e faalogologo lava foi, aua o mea nei e tatau lava ona... O lau faatulagaga lena o mea e tatau ona faamuamua, o le Matagaluega lena o Faatoaga, o lau lava lea faamuamua e tatau ona ave i ai le faamuamua i taimi uma.

FOFOGA FETALAI: Ou te vaelupeina le saunoaga a le sui usufono mamalu, ona e talu ai e taua tele le tulaga o lau folasaga, a ua i ai le manatu, aua le faaluafesasia lau saunoaga muamua, le vaega o lau saunoaga muamua, lau folamua, ae tuu le Tala o le Tupe se i e saunoa lelei i ai taeao, ae ua lava lea mo tatou i lena aso, aemaise foi le faafofoga tapuai mai a Samoa, o lea ua manino auofala i lou finagalo, o lo tatou maluapapa ma lo tatou malumauga lea o le Atua. Ia, taoto lena, ave lena mo tatou i lena aso. Ona i ai lea o le manatu, o le a faaauau lau saunoaga taeao leaga o lea ua tatou oo i le taimi e manava ai le tatou galuega.

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU: Ia, e faamalulu atu pe a faapea ua... ae afai o lou finagalo lea, o lea sa tau faauma atu lau lauga. Ae ui i lea, o le a fai lou finagalo, faafetai mo le avanoa. Manuia toe taimi o le tatou Fono.

FOFOGA FETALAI: Faafetai. A faapea o le a faauma mai, faauma mai loa ae se i... Ia ua lelei, ua faafofoga mai le tapuaiga a le atunuu ua logo faa-Tutuila foi le tulaga o lena aoauli. Ia, talu ai ona o lea ua tatou toai taunuu i le taimi e manava ai le tatou galuega i lena aso, ae tatou te le i tolopo, lau Afioga i le sui usufono mamalu, ae a pe a e faaiu maia le tatou Fonotaga i se tatalo.

Na tolopo Taulumaga a le Fono Aoa Faitulafono i le itula e 12:59 i le aoauli seia aulia le itula e 9:00 i le taeao o le Aso Lulu, 17 Iuni 2020.